



KEMENTERIAN  
PENDIDIKAN  
MALAYSIA

# BAHASA KADAZANDUSUN TAHUN 3





# **RUKUN NEGARA**

**Bahawasanya Negara Kita Malaysia**

mendukung cita-cita hendak:

Mencapai perpaduan yang lebih erat dalam kalangan seluruh masyarakatnya;

Memelihara satu cara hidup demokrasi;

Mencipta satu masyarakat yang adil di mana kemakmuran negara akan dapat dinikmati bersama secara adil dan saksama;

Menjamin satu cara yang liberal terhadap tradisi-tradisi kebudayaannya yang kaya dan pelbagai corak;

Membina satu masyarakat progresif yang akan menggunakan sains dan teknologi moden.

MAKA KAMI, rakyat Malaysia,  
berikrar akan menumpukan  
seluruh tenaga dan usaha kami untuk mencapai cita-cita tersebut  
berdasarkan prinsip-prinsip yang berikut:

**KEPERCAYAAN KEPADA TUHAN  
KESETIAAN KEPADA RAJA DAN NEGARA  
KELUHURAN PERLEMBAGAAN  
KEDAULATAN UNDANG-UNDANG  
KESOPANAN DAN KESUSILAAN**

(Sumber: Jabatan Penerangan, Kementerian Komunikasi dan Multimedia Malaysia)

KURIKULUM STANDARD SEKOLAH RENDAH (SEMAKAN 2017)

# BAHASA KADAZANDUSUN

## TAHUN 3 SEKOLAH KEBANGSAAN

### Editor

Rayner J. Francis

### Penulis

Charles Gustin  
Patrick Jolius  
Roslin Sampai

### Pereka Bentuk

Epi Wizani Auzan  
bin Abdullah

### Ilustrator

Zamzami  
bin Mat Zain



DBP

Dewan Bahasa dan Pustaka  
Kuala Lumpur  
2018



# KEMENTERIAN PENDIDIKAN MALAYSIA

NO. SIRI BUKU: 0025

KK 499-221-0102071-49-2043-20101  
ISBN 978-983-49-2043-2

Cetakan Pertama 2018  
© Kementerian Pendidikan Malaysia 2018

Hak Cipta Terpelihara. Mana-mana bahan dalam buku ini tidak dibenarkan diterbitkan semula, disimpan dalam cara yang boleh dipergunakan lagi, ataupun dipindahkan dalam sebarang bentuk atau cara, baik dengan cara bahan elektronik, mekanik, penggambaran semula mahupun dengan cara perakaman tanpa kebenaran terlebih dahulu daripada Ketua Pengarah Pelajaran Malaysia, Kementerian Pendidikan Malaysia. Perundingan tertakluk kepada perkiraan royalti atau honorarium.

Diterbitkan untuk  
Kementerian Pendidikan Malaysia oleh:  
Dewan Bahasa dan Pustaka,  
Jalan Dewan Bahasa,  
50460 Kuala Lumpur,  
No. Telefon: 03-21479000 (8 talian)  
No. Faksimile: 03-21479643  
Laman Web: <http://www.dbp.gov.my>

Reka Letak dan Atur Huruf:  
Menuju Puncak Supply & Services

Muka Taip Teks Macleeks2r Light  
Saiz Muka Taip Teks :16 poin

Dicetak oleh:  
Gayawara Sdn. Bhd.,  
No. 2, Jln. Nountun, Kg. Bambangan,  
Tingkat Bawah, Wisma Capital, Inanam,  
88450 Kota Kinabalu, Sabah.

## PENGHARGAAN

Penerbitan pakej buku teks ini melibatkan kerjasama banyak pihak. Sekalung penghargaan dan ucapan terima kasih ditujukan khusus kepada pihak yang berikut:

- Jawatankuasa Penambahbaikan Prof Muka Surat, Bahagian Buku Teks, Kementerian Pendidikan Malaysia.
- Jawatankuasa Penyemakan Pembedulan Prof Muka Surat, Bahagian Buku Teks, Kementerian Pendidikan Malaysia.
- Jawatankuasa Penyemakan Naskhah Sedia Kamera, Bahagian Buku Teks, Kementerian Pendidikan Malaysia.
- Pegawai-pegawai dari Bahagian Buku Teks dan Bahagian Pembangunan Kurikulum, Kementerian Pendidikan Malaysia.
- Jawatankuasa Peningkatan Mutu, Dewan Bahasa dan Pustaka.
- Jawatankuasa Pembaca Luar, Dewan Bahasa dan Pustaka.
- Jabatan Pendidikan Negeri Sabah.
- Jabatan Penjiaran Malaysia, Sabah (RTM).
- Kadazandusun Language Foundation (KLF).
- Puan Sitiimah binti Haji Sahat Unit Bahasa Kadazandusun, Sektor Pengurusan Akademik, Jabatan Pendidikan Negeri Sabah.
- Puan Bibiana Cecil Pakang Penolong Kanan Kurikulum, SK St. Joseph, Papar, Sabah.





# SUANG

Ponogulu  
Popointutun

iv - v  
vi

## TEMA 1 WINOUN SONDI

<b>UNIT 1:</b>	Sikul Koginawaan Ku	1 - 12
<b>UNIT 2:</b>	Sipoot	13 - 24
<b>UNIT 3:</b>	Timpu Ounsikou	25 - 32

## TEMA 2 WINOUN TOILAN

<b>UNIT 4:</b>	Pomoinan	33 - 42
<b>UNIT 5:</b>	Tuunion	43 - 54
<b>UNIT 6:</b>	Padsakayan	55 - 64
<b>UNIT 7:</b>	Tanom Posorili	65 - 76

## TEMA 3 WINOUN SUSUYAN

<b>UNIT 8:</b>	Pakalajaan	77 - 86
<b>UNIT 9:</b>	Tayam	87 - 100
<b>UNIT 10:</b>	Songongi'	101 - 114

Skrip Audio  
Glosari

115 - 119  
120 - 122

# PONOGULU

Poinsuang nopo do pakej buuk Boros Kadazandusun Toun 3 nopo diti nga buuk teks, buuk aktiviti om DVD audio. Sinuat o buuk diti tumanud nuludan Kurikulum Standard Sekolah Rendah (KSSR) (SEMAKAN 2017) i winonsoi Bahagian Pembangunan Kurikulum (BPK), Kementerian Pendidikan Malaysia. KSSR (SEMAKAN 2017) nga poposotol nogi do limo kabaalan. Kabaalan nopo dii nga Kabaalan Mokinongou om Maboros, Kabaalan Mambasa, Kabaalan Monuat, Kabaalan Kolumison Boros om Kabaalan Puralan Boros.

Buuk teks nopo diti nga kisuang do 10 unit miampai limo kabaalan mantad Dokumen Standard Kurikulum dan Pentaksiran (DSKP) KSSR (SEMAKAN 2017). Maya do unit di pinointutun, pinasarabak nogi mogikaakawo toilaan, Kemahiran Berfikir Aras Tinggi (KBAT), om woyo toluud.

Haro tolu tema pinogisugku id toinsanan unit. Tema nopo dii nga kokomoi Winoun Sondii, Winoun Toilaan om Winoun Susuyan. Uhu id suang do tema nopo nga pinili mantad DSKP Toun 3 do KSSR (SEMAKAN 2017). Haro nogi o Glosari om Koilaan Audio montok monguhup om popouhai di mongingia' om tangaanak.

Buuk Teks nopo diti nga gunoon miampai do buuk aktiviti. Nulud o suang do buuk aktiviti tumanud suang do buuk teks. Haro nogi DVD audio om QR montok monuduk do tangaanak kokomoi pomoroitan boros, loyuk, sinding, hiis, karaaralano' momonsoi om suusuai po.

Tumanud dokumen pomiawaian Boros Kadazandusun, montok ponuatan kreatif, nuru do suaton momoguno boros dialek do poimponu miagal id ponuatan hiis, sinding om suusuai po.

Pongia'an mambasa om monuat id suang do pakej nopo diti nga nulud tumanud kabaalan di touhai kumaa kabaalan di apangkal. Boros di kiwarana nopo id tikid unit nga oponsol do posotolon kokomoi uhu om kabaalan di poia'on.

Ponokoimpohon nopo do boros di gunoon id buuk diti nga dialek Bunduliwan tumanud do Memorandum Piniupakatan (*Memorandum of Understanding*) do *Kadazan Dusun Cultural Association* (KDCA) om *United Sabah Association* (USDA) di 11 Ngiop 1995. Poinkuro po nga kiwaa nogi boros mantad dialek suai do pinoruhang montok popoinggumu do tinimungan boros.



# KOPOMOGUNAAN OM KOTOLINAHASAN DO IKON ID BUUK TEKS

Momoguno o buuk diti di piipiro ikon miagal id siriba:



Kabaalan Mokinongou  
om Moboros



Kabaalan  
Mambasa



Kabaalan  
Monuat



Kabaalan Kolumison  
Boros



Kabaalan Puralan  
Boros



Aktiviti  
Tanganak



Woyo Toluud toi  
ko' Koilaan

Nuut Mongingia'

Nuut  
Mongingia'



Kemahiran Berfikir Aras  
Tinggi (KBAT)



Audio  
Aktiviti



Popolombus Boros  
toi ko' sisimbar



Suaton Aktiviti id  
Buuk Ponuatan



Pogintangan  
QR

Mantad do buuk teks, buuk aktiviti om DVD diti, alansan do kaanu daa iti monguhup di mongingia' om tanganak sikul balajal kokomoi Boros Kadazandusun di kohiok om kirati. Suai ko' ii, kikalansanan do kaanu daa popoingkawas do kabaalan id Boros Kadazandusun kumaa sukod wagu ngawi.



# POPOINTUTUN



Daren



Serlin



Sureen



Shanti



Ah Chong



Lee Lian



Adi



Fazura







# SIKUL KOGINAWAAN KU

TEMA 1  
WINOUN SONDI



## Intutunai



### SIKUL KOGINAWAAN KU



saat



dangol

tuugar

sikup



sangkal

tuung rinomos



1.2.1 (i)(ii)  
BA: 1

### Nuut Mongingia'

- Suhuon o tanganak mamarait boros id gambal miampai pomoroitan di kotunud.





## Kooturan Sikul

Kinongoho' audio kokomoi kooturan sikul om pinsingkanaai miampai tambalut.

### Poomitanan:



Soira id kantin nuru do ...




Muyud o tangaanak do momoli taakanon.



## Pibarasai dikoyu kooturan suai id sikul.

### Nuut Mongingia'

- Suhuon o tangaanak mokinongou audio, mambasa suat om popolombus kooturan sikul di narait.
- Muihot om misimbar o tangaanak kokomoi audio di pinarangahan.





## Pogibaabasai



Siou no kopio tu nosindualan ko.

Kotoluadan kumaa dikoyu.

Alansan daa do olingasan ko do oruhai.



## Pomusarahai.

- Nokuro tu mogowit do titungkap soira mongoi tombului tambalut di sumakit?
- Lukiso' id buuk ponuatan nunu i kosudong do owiton soira tumombului tambalut di sumakit.

## Poomitanan:



1.5.2 (ii)

### Nuut Mongingia'

- Pokionuon tangaanak do popolombus piumpangalan id sawat.
- Suhuon tangaanak poposogu pason monongkosiou do suusuai.



Kumaa di Daren,  
**Notorimo** ku no i suat nu di konihab. **Langadon** tomod yahai dika. Haro tolu tulun tanak sikul kawawagu do hiti. Yolo nopo nga i Sureen, i Fazura om i Serlin.

Koilo ko, ogumu nodi nokosimbanon diti sikul. Ogumu taman **kisulap** om mural linukis. Minaan nogi **botungai** i Taman Matematik. Osindak om **olidang** iti sikul do baabaino diti.

Nakalantoi oku do piboian Tadarus **Al-Quran** ponong Zon Putatan di minggu nakatalib. Nakaanu oku do gaa sabaagi **qari** bobos tosonong. Ounsikou tomod ginawo ku. Tumanud oku kawagu do piboian diti do toun dumontol.

Daren, iti no osiwatan ku monuat montok dika. **Siwaton** ku kawagu monuat suat kumaa dika do timpu dumontol.

Tambalut nu,  
**Rafiq**




## Simbaro' do otopot toi ko' au otopot kokomoi koilaan id teks.

1. Poungkapon o suat diti montok di Rafiq.
2. Haro apat tulun tanak sikul kawawagu id sikul di Rafiq.
3. Kisulap ii Taman Matematik.
4. Nakaanu i Rafiq do gaa id pialaan manangkus.

### Nuut Mongingia'

- Mambasa' o tangaanak momoguno loyuk om intonasi di kotunud.







## Intutunai Pimato Tumanud Gambal



Bayahan Rafiq,  
nakalantoi ko id  
piboi'an diti!

Kotoluadan  
kumaa  
sokodung  
dikoyu.



Iti nopo nga pimato  
konsonon noolos.



## Polombuso' boros kipimato noolos.

qari

qariah

al-Quran



2.2.3 (iii)  
2.1.3 (iii)


### Nuut Mongingia'

- Suhuon o tangaanak mambasa pibarasan miampai loyuk di kotunud.
- Suhuon o tangaanak mamarait boros kipimato noolos /q/.





# Intutunai Boogian Sikul



gana

gamban

kantin

sinasawat

lalambangan

tinambahai bosikol

linimput mongingia'

papan kopoilaan

sulap munguungumolig

Nuut Mongingia'

• Suhuon o tangaanak mongija' om popolombus boros.

2.2.2 (x)  
3.1.2 (x)  
BA: 4





## Iloo' Boros Ula

**Boros ula** nopo nga manahak kointalangan kokomoi kouyuuyuo' tulun, tayam, kinoyonon toi ko' kakamot.

Boros kiwarana nopo nga boros ula.

Oomis o roso do tindalam diti.



Alandui o bontuk do kek diti.

- Boros ula woyo – olumis, aparu, osuau
- Boros ula bontuk – ourod, alandui
- Boros ula ponuku – agayo, akawas
- Boros ula pancaindara – oosin, oonsom



## Gonopo' ayat momoguno boros ula di kosudong.






Aparu

Oonsom

Akawas

Ourod

Osiiau

1.  o osimbulan di John.
2.  i Ah Chong do balajal.
3.  o bontuk dilo buul.
4.  i Serlin do manangkus.
5.  o roso dilo limau.

5.2.2

### Nuut Mongingia'

- Suhuon o tangaanak do mogihum boros ula do suai.



## Intutunai Boros Maan

Gunoon o boros maan do manahak kointalangan kokomoi koimaan toi ko' isoiso kohuboyoon.

Boros kiwarana nopo nga boros maan.

- Aparu i Daren do balajal.
- Aanangan i Daren do mambasa buuk.
- Oporokis i Daren do mimbuul.




## Tadau Pitabangan id Sikul

Kopisanangan kumaa toinsanan. Poposorou oku kawagu dikoyu kokomoi pitabangan momolidang om monindak sikul ontok tadau Kukuak diiti. Alapon ku toinsanan do rumikot.

Kalaja nopo do maan tokou nga momolukis mural, momuhu siamut posorili sikul, mongutus sakot, om suusuai po. Suai ko' ii, au nogi olingan mananom bunga.

Owiton no dikoyu kakamot i kosudong ontok do tadau dii.



## A. Patayado' boros maan mantad teks.

1.      2.      3.      4.      5.      6.      7.      8.      9.     

## B. Gonopo' ayat id siriba.

1.      yolo do mural id kalas.
2. Sinuhu di mongingia' i tangaanak      siamut id posorili di sikul.
3.      do sakot ilo tangaanak.

### Nuut Mongingia'

- Suhuon o tangaanak momogonop ayat id buuk ponuatan.
- Suhuon o tangaanak papatayad boros maan id buuk ponuatan.

5.2.2







## Pomonsoi Boros

Adadi do boros ponuhuan o boros ula soira osugkuan do **boros posugkuon dohuri 'on'**.



Lidangon tokou o posorili sikul. Owiton dikoyu o kakamot di kosudong ontok do tatau dii.

Boros Ula

Boros Nosugkuan

lidang

lidangon


owit

owiton

on



## Pinsingumbalai.



tokou ilo mija.



tokou ilo siamut.

5.3.1 (x)  
1.2.2 (x)  
BA: 5

### Nuut Mongingia'

- Suhun o tangaanak mamarait boros nosugkuan momoguno pomoroitan di kotunud.



# Sompipio' Boros Kivokal Toniba' om Kimora




papan ponuatan



jam

Jaam koturu no.



momugas

Hiti potimpakan diti **kaap**.



Nonggo pouludan diti **buuk**?



Kano **pataam** siamut.



Nuut Mongingia'

- Suhuon o tanganaak monompipi boros kivokal toniba' om kimora id buuk ponuatan.



## Uludo' om Suato'

### Sangadau id Sikul

Tikid kosuabon mongoi oku



isukl



. Momolidang

oku do



aklsa



miampai tambalut. Otorodok oku

mokinongou pongia'an di



mnogignia'



. Soira

orikot timpu koundarangan, mongoi oku id



akntin



sikul. Mongoi oku nogi pambasa



ubku



id librari. Orikot nopo timpu koulian, muli oku miampai tongotambalut.

Sumakai yahai do



absa



3.1.1 (i)(ii)  
5.1.1 (i)(ii)

#### Nuut Mongingia'

- Suhuon o tangaanak monuat kawagu pangan id buuk ponuatan.





## Tanak Sikul Tosonong

Mosik ma doung kosuabon  
Mugad no mongoi sikul  
Kada lihuai pinsil  
Kada lihuai buuk  
Mowit nogi kokorui.

Soira ko hilo id sikul  
Kada lihuai angkabon  
Mintotos no balajal  
Momit woyo tosonong.

Soira do abaal ko  
Om koingkawas koposion  
Kada lihuai tapa  
Kada lihuai tama  
Sorohe no ngawi tobpinai  
Baino di asanang ko  
Uhupai no tulun suai.

*Roiton sinding Sinupu di: Nathaneille Patrick  
Kinonuan loyuk: Hius Penampang,  
Zandi Rosina Sogondu Ongut*



### Nuut Mongingia'

- Mokinongou audio om minsingumbal popolombus hius.

4.2.1 (iii)





# SIPOOT

TEMA I  
WINOUN SONDII



## Intutunai om Pibarasai



minluda



miala



nakalantoi



pomilian



mamaramit kaap

Nopili i Daren mobi sikul do mimbuul. Minluda di isio do tikid tadau. Nokuro?




1.1.2 (i), (v)  
1.2.2 (i), (v)

### Nuut Mongingia'

- Suhuon o tangaanak monoinu' pomoroitan boros montok mongintutun boros nosugkuan i orongou mantad audio.



# Sumiliu Bontugan Sipoot



Nunu kowosian do aanu songulun i minggoos om minluda id sipoot?

**Nuut Mongingia'**

- Suhuon o tangaanak mokinongou audio om monimbar ponguhatan.



## Piumpangalai

Hai Ah Chong, norongou ku tuminanud kou piboi'an mimbuul nayatan Watas Tamparuli. Otopot toi?

Isai nakalantoi?

Otopot iri Lee Lian.

Nakalantoi limbou koiso i tinimungan sikul dahai. Limbou koduo nopo nga tinimungan SK Kukut. Limbou kotolu nopo nga tinimungan SK Kasari.

Atukoi, bayahan montok kinalantayan dikoyu kio!

Pounsikou kio Lee Lian.

Alansan daa kotilombus kasaasari o kalantayan dikoyu id timpu dumontol.

Iri no da kalansanan dahai ti Lee Lian. Potilombuson dahai do minluda tikid minggu mooi do \_\_\_\_\_.



Polombuso' iso piumpangalan di olinuud montok mamason kounsikahan kumaa tambalut di nakalantoi id isoiso' piboi'an.



Bayahan \_\_\_\_\_

1.5.2 (i)  
1.3.1 (ii)  
BA: 8

### Nuut Mongingia'

- Suhun o tangaanak popolombus piumpangalan di olinuud tumanud teks id sawat.






## Kanou Mambasa'

### Kanou Minsipoot

Nokokito ko di  
abaabayan  
mamana' id  
televisyen di  
kosodop?

Atukoi!  
Nakalantoi o  
tinimungan  
Korea?



Nokokito,  
nakalantoi o  
tinimungan  
mantad Korea.


O bo. Otiru  
tomod moti gia  
tinimungan Korea.



## Pilio'

Siou Daren amu oku  
nokoongoi pamain  
konihab , .  
Minongoi oku poki  
x-ray diti gakod  
ku , .

Nosidualan  
maamaso mamain  
buul konihab , .



Atukoi , ! Nokuro  
o gakod nu , ?

Siou no kopio  
dia , .  
Alansan daa  
olingasan ko  
toruhai , .  
kio Adi , .

### Nuut Mongingia'

- Suhuon o tangaanak momili' tanda' basa' di kotunud montok mogikaakawo ayat.



### Nodimpot Iman-Imanon Ku

Hi Jack, nakalantoi ko id piboi'an padau loyog id Sipoot SEA di minggu nakatalib?

Atuukoi, bayahan dia nakalantoi limbou koduo id Sipoot SEA! Ogumu minampayat id abaabayan diti mantad pogun suai. Okon ko' ouhai kalantoi id piboi'an dii.

Pogiroton no sunduan nu do monongkiala om minluda toriirimo kio.

Alansan oku daa kosiliu ko bontugan id pialaan padau loyog montok pogun.

Hi Lina, nakalantoi daa nga okon ko' limbou koiso. Limbou koduo oku no bogia.

Iri no bo. Ogumu tomod o ponongkiala mantad pogun suai.

Poingkaa no ti do baino. Monotos oku minluda mooii do kosiliu mobi pogun id piboi'an padau loyog ontok Sipoot SEA.


Kounsikahan kumaa dika Lina. Iri no lansanon ku.



2.2.5 (iv) (a)

**Nuut Mongingia'**

- Suhuon o tangaanak mambasa opuhod miampai momoguno intonasi om loyuk di kotunud montok mamason kounsikahan.





# Basao'

## Sunduan do Minsipoot



**Nokokito** i Ah Chong do kopoilaan pomilian mamain hoki.

**Ruminikot** i Ah Chong id pomilian dii miampai tambalut dau.



**Ounsikou** i Ah Chong tu **nopili** isio id pomilian hoki dii.

**Minluda** yolo id gana sikul tikid sodopon.



**Nakaampayat** o tinimungan di Ah Chong do piboi'an mamain hoki id watas diolo.

**Ounsikou** ginawo diolo tu **nakalantoi** id piboi'an mamain hoki id Watas Tampiruli.



## Boros kiwarana taragang nopo nga boros nosugkuan gulu.

Ralan kapamansayan boros nosugkuan gulu.

**Boros Guas**

**Posugkuon Gulu**

**Boros Nosugkuan**

kito	→	noko	→	nokokito
lantoi	→	naka	→	nakalantoi



Onuai boros posugkuon gulu o boros id siriba.

i) boros =

ii) buul =

iii) lasu =

iv) luda =

v) main =

vi) ampayat =

### Nuut Mongingia'

• Suhuon tangaanak mongija boros nosugkuan om mingsingumbal monugku boros.







## Kanou Monuat



### Suato' sisimbar di kotunud.

Pinapaharo o sikul di Daren do abaabayan mamarabai kampung. Tuminanud ngawi i tambalut di Daren do abaabayan dii. Iti no kinootusan do pialaan dii.

Ngaran	Limbou	Ngaran	Limbou
Darren (051)	Koiso	Ah Chong (039)	/
Sureen (033)	Koduo	Dian (048)	/
Adi (090)	/	Neckly (121)	/
Nina (026)	/	Nancy (082)	/

5.3.1 (i)

#### Nuut Mongingia'

- Suhun tangaanak momogonop om suaton id buuk ponuatan.



# Iloo'

Nuludan ayat do MSOO nopo nga iso ayat di kiharo do boros maan/predikat, subjek, objek om objek. Milo gunoon ayat nuludan do MSOO maya pibarasan miagal id siriba.

## Poomitanan:

Boros maan + Subjek +		Objek	+	Objek
<b>Minomoli</b>	<b>oku</b>	<b>do kasut sipoot</b>		<b>miampai tina ku.</b>
<b>Nolihuan</b>	<b>ku</b>	<b>i kasut sipoot</b>		<b>ku hilo lamin.</b>

Hai Sureen, nonggo tadon nu?



Hai Serlin, mantad oku hilo kakadayan. **Minomoli oku do kasut sipoot miampai tina ku.**

Nokuro tu miagal tumongob ko Fazura?



Orosian oku katagadan di mongingia' tu **nolihuan ku i kasut sipoot ku hilo lamin.**

Ayat kiwarana taragang nopo nga popokito iso ayat tumanud nuludan do MSOO.



## Suato' ayat suai tumanud nuludan MSOO.

	Boros maan + Subjek +	Objek	+	Objek
i.	<input type="text"/>	<input type="text"/>		<input type="text"/>
ii.	<input type="text"/>	<input type="text"/>		<input type="text"/>

### Nuut Mongingia'

- Tudukan o tangaanak mongintutun om momonsoi ayat momoguno nuludan MSOO.

5.4.1 (i)  
5.4.2 (i)  
BA: 10





## Toinuo' om Suato'



Minluda i Adi do **buul mim** tikid tatau hilo id gana sikul.

Nokolimbou **iso' ko** i Lana id piboi'an **na' ma ma** nayatan Watas Kota Kinabalu.



Nakalantoi i Anna id piboi'an **sa mi gu kus ma nang** ontok Sipoot Sikul.

Aparu i Lolin do minluda **ki ho** tikid sodopon mooi do kodimpot iman-imanon limbou koiso.



Mulong po au nakalantoi limbou koiso id piboi'an **min bad ton** nga ounsikou kasari ginawo di Boni tu nakalantoi **bou lim lu to ko** .

3.1.2 (i), (v)

### Nuut Mongingia'

- Suhuon o tangaanak monoinu' om monoriulud putul boros di kiwarana.





## Iloo'

### Sumiliu Mamaamain Buul

**Minongoi** pomoli kasut buul i Adi soira nopili isio mobi sikul nayatan watas Tamparuli. Suhuon isio di mongingia' **monotos minluda** tikid tadau moo do ogoris o tinan soira orikot piboi'an.



Unsubon kasari isio di molohing dau do minluda. **Ounsikou** i Adi tu sokodungon di molohing disio. Mantad dii, **agayo** ginawo dau do minggisom mamain moo do kalantoi.

Soira norikot timpu piboi'an, mininggisom isio om tongotambalut dau do mamain. Sundung po do **ohuyan** nga au diolo podulion. Nakalantoi o tinimungan diolo id piboi'an dii.



#### A. Patayado' boros nosugkuan gulu MoN- om o-.


_____ /
_____ /
_____ /

_____ /
_____ /
_____ /

#### B. Onuai boros nosugkuan gulu MoN- om o- boros id siriba.

- i) susui = \_\_\_\_\_ /    ii) singud = \_\_\_\_\_ /    iii) tungu = \_\_\_\_\_ /  
 iv) gompil = \_\_\_\_\_ /    v) boli = \_\_\_\_\_ /    vi) makan = \_\_\_\_\_ /

3.1.3





## Monuat Autobiografi

Ponuatan autobiografi nopo nga iso ponuatan okon kifomat. Ponuatan nopo diti nga kokomoi kowoowoyoon koposion isoiso kakamot. Karaaralano monuat:

Ponogulu: koilaan tinan sondii

Tonsi ponuatan: nagayat ginawo – olumis o bontuk – apagon o gatang – songulun kusai – pomoli doho – gunoon oku – pamain – tikid tadau

Pomupus: piipiro tulan – amu olumis – naratu om nokilong – pinoopi oku id sitor


### Yoku I Raket Badminton

Yoku i Raket badminton. Winonsoi oku mantad do kayu, fiber om gata. Winonsoi oku hilo id kilang om pinaatod oku hilo kakadayan sipoot soira nopongo.

Pinowiliu oku id iso lamari soromin. Ogumu tulun nagayat ginawo soira kokito doho tu olumis o bontuk ku. Mamarayou ngawi yolo doho tu apagon tomod o gatang ku.

Insan tadau, nokorikot songulun kusai do minongoi pomoli doho. Gunoon oku disio ontok mongoi pamain badminton tikid tadau.

Piipiro tulan nodi, amu oku di olumis miagal di pogulu. Insan tadau naratu om nokilong oku. Amu oku di milo gunoon. Pinoopi oku dii id sitor.



A. Ponuat iso autobiografi kokomoi kakamot sipoot suai tumanud ponuatan autobiografi id sawat.



3.3.1 (iii)  
2.2.5 (iii)  
BA: II

#### Nuut Mongingia'

- Suhuon o tangaanak monuat autobiografi suai kokomoi kakamot sipoot id buuk ponuatan.





### Yoku i Buul

Kakamot gunoon: Kalatas A4, gunting, pongokot om gaam.


- 1 Lopion o kalatas A4 kumaa apat boogian.




- 2 Guntingon o kalatas A4 tumanud rulud.



- 3 Uludon o kalatas om sumiliu iso buuk tonini. Suaton no uhu, ngaran om kalas tangaanak.



- 4 Lukison o gambal buul, suaton o jenama, warana, winonsoi mantad nunu om gatang do buul id suang buuk tonini.





# TIMPU OUNSIKOU

TEMA I  
WINOUN SONDI



Sindingo'



Audio 7



Audio 8

## Tadau Paganakan Ku

Tadau paganakan ku  
**Ramayon** tadau baino  
Tobpinai sodu om somok  
Rumikot id lamin ku.

Molon tolon i mamai  
Siakan do sinuko  
Ogumu o taakanon  
**Hinava** om **pinarasakan**.

Korus

Kongingis i todu ku  
Opoto ngawi **akanon**  
Mangkan do **linopot**  
**Kanasan bosou** sada, hei!

**Siwaton** mongoi akan  
**Umbalan** lo pinosurung  
Oikuman nopo mangakan  
Louson moti tian.

*Sinupu di: Roslin Sampai*



Nunu kowosian papaharo tadau paganakan?



Pohoroon Tadau Paganakan montok monimung  
om mongintutun koobpinayan.

1.1.2 (vii)  
1.2.2 (vii)  
BA: 13

### Nuut Mongingia'

- Suhuon o tangaanak suminding tumanud audio.
- Uhupan o tangaanak monoinu' boros nosugkuan.



## Panau Ontok Tadau Kaamatan



**Simbaro' ponguhatan mantad teks rencana di norongou.**

1. Nonggo o tinombului di Serlin om molohing disido? 🗨️
2. Roito' tolu kawo taakanon pinokito id pokiikitanan taakanon koubasanan dii. 🗨️
3. Nunu o nansak id piboi'an magansak taakanon koubasanan? 🗨️
4. Isai nakalantoi id piboi'an magansak dii? 🗨️
5. Nung ika nokoongoi id pokiikitanan taakanon dii, nunu taakanon bolion nu? Nokuro? 🗨️ 🧠



**Piula-ula no manganu taakanon ontok makan moo do aiso kosima.**

### Nuut Mongingia'

- Suhuon o tangaanak mokinongou audio miampai mintong gambal id buuk teks.
- Suhuon o tangaanak monimbar ponguhatan kokomoi rencana di pinarangahan.





## Basao'

### Taakanon Koubasanan Opoto



Iti nopo nga **hinava**. Winonsoi iti mantad tonsi sada rinalatan do juus worung, tusi, lado om kulunsong. **Oonsom-onsom** o kaakanan diti.

Iti nopo nga **bosou**. Koubasanan nopo do bosohon nga momoguno sada, takano, tusi om pangi. Kawasa nogi ralatan kinotuan. Posuangon id kakanan om gambaranan. Kiikiro katalib duo minggu, milo no akanon. **Oonsom** o roso dau.



**Pinompol** nopo nga tindalam mantad natok rinalatan do piasau kiningkin om gula. Onsokon iti id poriuk di **otuu** om aiso tumau. Lompingon id poriuk gisom aansak. **Oomis-omis** o kaakanan do pinompol.

**Juus** tua'ua' nopo nga tiinumon di kolidas do tinan. Mogisusuai tua' om kinotuan i milo do wonsoyon do juus miagal ko' oren, lubak, apol om susuai po. Haro juus oomis om haro nogi juus **opooporot**.



Opoto o tuhau wonsoyon do **sambal**. Oribon toi ko' tutukon i tuhau. Ralatan do tusi om suka toi ko' worung. Orohian nopo do **opoopodos** nga ralatan do lado tokuri. Nung orohian di **opodos** nga gumuon o lado.



Suai ko' pinompol, kawasa nogi wonsoyon do nantung toi ko' binohigut i natok do **rumbio**.

2.2.2 (vii)  
2.2.4 (i)  
BA: 15

#### Nuut Mongingia'

- Suhuon o tangaanak mongija om popolombus ngaran taakanon.
- Suhuon nogi o tangaanak mongilo roso do taakanon dii.
- Uhoton o tangaanak poingkuro taakanon sumiliu pongindopuan.





# Iloo'

## Id Lamin di Todu

Sompuruan **boros ngaran** nopo nga boros ngawi di momungaran do tulun, kinoyonon om kakamot. Sompuruan **boros ula** nopo nga boros di popoilo kowoowoyoo do isoiso boros ngaran toi ko' frasa ngaran.

A




Atangkangau i todu momonsoi do tindalam.

B



Ogumu o tindalam winonsoi di todu miagal karipap, linompuka om susuai po.

C



Haro **opoopodos** om haro **oomis** dii tindalam.

D



Aanangan i Daren mangakan do tindalam di todu tu **ongopoto** ngawi.

E



Naawi no kupi di aki odu. Ihibai po iti sangkir disio.


Ruhangai ku po diti gatas. **Olunok** moti kupi ruhanan diti.



Pantango' om upuso' no molohing tokou.

### Nuut Mongingia'

- Suhuon o tangaanak monompipi boros ngaran om boros ula momoguno peta pomusarahan.





## Intutunai Ayat MSAk

Poomitanan ayat tumanud nuludan MSAk: Minongoi i Daren hilo id sikul.

Boros Maan (M)	+ Subjek (S)	+ Adjektif kinoyonon (Ak)
Minongoi	i Daren	hilo id sikul.

### Diari ku.

#### 6.00 dungosuab

Osuab oku po minosik. Podsu oku no id popodsuon.

#### 8.00 dungosuab

Minagangat i tina ku mongoi id pasar. Mongoi yahai pomoli do manuk om kinotuan montok mamaramai tatau kinolodion di tadi ku.

#### 8.30 dungosuab

Magandang yahai do baas id stesen baas. Daamot magandang baas, mibooboros yahai nunu tutungkap patahakon montok di tadi ku.

#### 9.00 dungosuab

Nokorikot yahai id pasar. Minomoli i tina do manuk, kinotuan om suusuai po. Minongoi nogi yahai id kadai buuk. Minomoli oku tolu buuk sorita montok ponungkap di tadi ku.

#### 10.00 dungosuab

Pogulu minuli, minakan yahai id restoran. Ongopoto tomod ii taakanon do hilo.

#### 12.30 pitangaadau

Nokorikot yahai id lamin. Ounsikou ginawo ku tu nokoponguhup di tina do minomoli-moli.



5.4.1 (ii)  
2.2.4 (i)  
2.4.1  
BA: 17

#### Nuut Mongingia'

- Tudukan o tangaanak mongintutun pola id ayat noruludan.
- Suhuon o tangaanak mogintutun ayat suai ii miagal o pola ayat.
- Ponginluuban: Suhuon o tangaanak monuat ayat noruludan id buuk ponuatan.







## Suato'

Pimato tagayo: Gunoon montok pimato id gulu isoiso' ayat.

Gunoon nogi montok pimato id gulu boros poimbida.

Titik (.): Gunoon id kolimpupuson ayat toomod.

Tanda Pongudio (?): Gunoon id kolimpupuson ayat pongudio.

Koma (,): Popitongkiad do tolu toi ko' lobi unsur id iso' ayat.

## Magansak Hinobok

**Serlin:** Oongid no ti taakanon nansak nu aka.


**Taka:** Iti no hinobok. Posurungan ku kumaa di tambalut mantad Kabaatan Malaysia do tiinu.

**Serlin:** Nunu bahan gunoon minomonsoi diti?

**Taka:** Momoguno do parai wagu, waig, gula om piasau tomulok.

**Serlin:** poingkuro ko minagansak dilo ( / )

**Taka:** Gowihon i parai wagu gisom kosoosokulit om aangod o kosingudan. tutuon gisom oidu o kulit ( / ) Atapan ii parai wagu notutu. Posuungan i wagas id mangkuk.

Tunguhon do 2 galas waig di kogoogolok. Somponon gisom 5 minit om ralatan nogi do waig piasau ( / ) tonsi piasau om gula ( / ) Umbalan gisom osuhatan o koomiso'. 

**Serlin:** Obuli oku mokianu tokuri?


**Taka:** Obuli. Na, umbalai.



Hinobok nopo nga taakanon koubasanan i koubasan id watas Penampang om Papar.

## Nuut Mongingia'

- Tudukan o tangaanak mongintutun tanda' basa'.
- Suhuon o tangaanak monuat kawagu ayat noruludan momoguno tanda basa di kotunud.





Iloo'

## Adat Ontok Kinolodion

Nakaampayat i Daren id Program Kiim Koubasanan Tinaru Kadazan om Dusun i pinaanjul do Kelab Bahasa Kadazandusun SK Wakid. Ontok abaabayan sodop koubasanan, sinuhu pipiiru tangaanak do monusui kokomoi kaadat-adato' do tinaru diolo.



Kopiwosian doungeutung. Yoku nopo nga i Dominik. Yoku nopo nga Tinaru Dusun Tatana mantad Kuala Penyu. Baino, monusui oku kokomoi adat mamaramit kosusuon baragang. Nung osusu do dungeadau, nuru do owiton i tanak id labus lamin mooi do ababangan do tadau. Nung osusu do dungeutung, titihon do binabang lampung gisom koontiho. Ii nopo kinibit dau nga posuargon id poyanan komoyon do bayung. Pogiwison ii id toning do bombong lamin ponokotanda' ginumu tanak id paganakan dii.

Kopisanangan doungeutung. Yoku nopo nga i Albin. Tinaru Kadazan oku mantad Watas Papar. Baragang nopo di kosusuusu nga au po kawasa polobuson mantad lamin gisom orikot turu tadau. Ii nopo kinibit dau nga posuargon id langod do poring. Araban po do tau om somponon. Ngoyon nodii di tapa posowito' id puyut do lamin mooi do au koinsodu o sunduan di baragang. Sorilian ii do raan worung kirugi mooi do au ngoyon do kosisingud.



Modsopik nopo nga iso adat momungaran ontok tadau kawalu mantad kinosusuon di baragang.

4.1.1 (ii)  
BA: 19

### Nuut Mongingia'

- Suhuon o tangaanak popolombus pisuayan do kaadat-adato' i pinosusui di Albin om i Dominik.





### Andai Momungaan Baagang

Miad-iad no i Zunga ka  
Mangi-tangi no i Zunga ka.

Nunu no ma iadan ka  
Nunu no ma itangi ka.

Miad mokipungaan ka  
Miad mokiputondo ka.

Putandaai ku nopo ka  
Pungaanai ku nopo ka.

Pasaasangazo ku do Toombung ka  
Oombung kosunizo nu Oton ka.

*Kinoonuan:*

*Zandi Rosina Sogondu  
Kampung Nampasan,  
Penampang*

*Transkripsi:*


*Zandi Rita Lasimbang  
(KLF)*



Andai nopo nga hiis di polombuson ontok momungaran di baragang. Polombuson ii moo do awanadan o kopoposion dii baragang maamaso sumurut.

#### Nuut Mongingia'

- Suhuon o tangaanak popolombus andai tumanud audio.







**Sudawilo'**



## Pomoinan Kohiok

Longkudi oi longkudi  
**Asawat** ko tumulud  
Gisom do **koingkawas**  
Tumulud mongoi tawan

Tagu oi tagu  
Mantad puun do lugus  
**Mintagu miambalut**  
**Misowoli mama gayat**

Tubau oi tubau  
**Otolong** do tumurug  
**Mamain** asadapan  
Kada lihuai muli

Tambalut oi tambalut  
Kanou tokou mamain  
Kanou tokou **minguyat**  
**Popogiro**t piombolutan.

*Sinupu di: Roslin S*



**Kada tokou lihuai pomoinan koubasanan.**

1.1.2 (iv)  
1.2.2 (iv)  
BA: 21

### Nuut Mongingia'

- Suhuon o tangaanak do monudawil tumanud audio.
- Suhuon o tangaanak popolombus boros nosugku id gulu di kiwarana miampai pomoroitan di pointunud.
- Tudukan o tangaanak boros guas montok boros nosugku i kiwarana.



### Tadau Tangaanak

Osuab po i Fazura om i Sureen minongoi sikul. Haro o kapanaandakan Tadau Tangaanak id sikul diolo. Au yolo kaandad do mampayat di pomoinan rinukut-rukut.

Potimpuuno' no di mongingia' o abaabayan pomoinan rinukut-rukut di jaam koturu. Minampayat i Fazura om i Sureen do piipiro pomoinan.

Nokolimbou koiso i Sureen id pomoinan **mongobus toobusan** gisom oloput. Nokolimbou koiso i Fazura id pialaan **manangkus poinsuang karung om** pomoinan **poposuang buul id balatak**.

Kalapas mamain, ongoi no yolo intong do pialaan **mamain catur**, **mamanau torumpak** om **mamain congkak** montok tangaanak Taang Koduo. Angabaal ngawi yolo mamain.

Kopongo nopo ngawi o pomoinan, onuai no yolo do wawa. Pogitaatabi po yolo pogulu minuli miampai ginawo ounsikou.



Mamain kaanu mongolihis do ginawo om koidu hongkob pomusarahan.

#### Nuut Mongingia'

- Porongohon o tangaanak do audio pogulu suhuon mambasa do opuhod.
- Suhuon o tangaanak mongintutum om popolombus boros kipimato noolos /c/.

2.2.2 (iv)  
2.2.5 (ii)  
2.2.3 (i)  
BA: 22



**Toinuo'**

**Pomoinan**

**doungguugulu**

**moden**

kingking



Play Station



korutut



korita-korita lotirik



longkudi



helikopter kiremote



Orohian oku mingkingking.

Aramai mamain miampai tambalut. Kouyat nogi do tinan.

Nokuro tu orohian ko dii?



2.3.1(iii)  
BA: 23

**Nuut Mongingia'**

- Suhuon tangaanak mambasa ngaran do pomoinan.
- Uhoton o tangaanak kokomoi pomoinan korohian diolo.
- Suhuon o tangaanak monoinu om popoboros kowosian om koluhyon do pomoinan id carta.





## Pomonsoi Boros

### Taman Pomoinan

Tikid sosodopon, mongoi i Daren om tongotambalut pamain id taman pomoinan. Ounsikou yolo tu nawansayan do taman pomoinan id somok lamin diolo. Tamangan kasari diolo kolidangan id taman dii moo*i* do olumis. Tamangan nogi diolo i tongopomoinan moo*i* do au orumbak om au koligogon maso mamain.



### Simbaro'.

Id pomusarahan nu, nokuro tu nuru do koruhangon di molohing i tangaanak diolo ontok mongoi pamain id taman pomoinan?





## Gonopo' ayat id siriba.

Poomitanan:

Minsulimbang i Daren id papan sulimbang miampai di tabang disio.

1. Mintontoidon i Lee Lian id \_\_\_\_\_.
2. Mingkiriison i Serlin id \_\_\_\_\_.
3. \_\_\_\_\_ i Adi id bosu pinlantaidan.
4. \_\_\_\_\_ i Ah Chong do helikopter kiremote.
5. \_\_\_\_\_ i Fazura om i tambalut disido do \_\_\_\_\_.
6. \_\_\_\_\_ i Sureen om i tadi disio momoguno \_\_\_\_\_.



tontoidon

kasut  
kibulandai

singinggayanak

5.3.1(iv)  
BA: 24

### Nuut Mongingia'

- Suhuon o tangaanak mambasa boros ngaran kokomoi pomoinan.
- Suhuon o tangaanak momogonop ayat momoguno boros maan om boros ngaran kokomoi pomoinan.



## Intutunai Boros Maan Transitif

Boros Maan Transitif nopo nga boros maan di kiwaa objek.

Boros Maan Transitif	Objek
mamain	sininggayanak
binoli	di Serlin

Kiwaa duo kawo boros Maan Transitif.

### Boros Maan Transitif

**Boros Maan Transitif Aktif**  
(kiboros nosugkuan moN-)

**Poomitanan:**

ma**m**ain sininggayanak  
mo**n**omb**i**r rasuk

**Boros Maan Transitif Pasif**  
(kiboros nosugkuan sisipan -in)

**Poomitanan:**

pi**n**omoinan di Serlin  
ti**n**omb**i**r di Serlin



Aanangan i Serlin, mamain do sininggayanak miampai di tongotambalut disido. Binoli di Serlin ii mantad kadai pomoinan.


Olumis o rasuk di sininggayanak di Serlin. Abaal i Serlin monombir do rasuk di sininggayanak tu tinudukan isido di tina disido. Ongolumis o rasuk tinombir di Serlin.

Pinungaranan di Serlin i sininggayanak disido do i Sumandak Salapid tu sinalapid o tobuk dau.

Ounsikou yolo mogiambalut om mamain di sininggayanak. Alansan yolo do kotilombus pogiombolutan diolo gisom kagayo.

#### Nuut Mongingia'

- Suhun o tangaanak mambasa om papatayad boros maan tumanud kawo.







## Pomoinan Kaanangan Ku



1. **Min** **bau** **tu** i Adi miampai tambalut disio.
2. Nakabaal i Serlin **tu** **ba** **mim** tu mamain kasari isido tikid tadau.
3. Aanangan i Shanti mamain **ning** **si** **ya** **ga** **nak** i winonsoi disido sondii.
4. Akawas o tinuludon dilo **ku** **long** **di** di Sureen soira osougi tongus topuhod.
5. Ounsikou i Ah Chong **gu** **ta** **min** miampai di Daren id natad do lamin.
6. Minluda i Sani **pa** **nau** **ram** **min** tu mampayat isio id piboian rampanau ontok sipoot rinukut-rukut tadau paganakan diolo.



# Suato'

Aa Bb Cc Dd Ee Ff  
 Gg Hh Ii Jj Kk Ll  
 Mm Nn Oo Pp Qq Rr  
 Ss Tt Uu Vv Ww Xx  
 Yy Zz




miguugusa minkorutut mintubau



mincongkak minlongkudi mingguli

### Nuat Mongingia'

- Tudukan o tangaanak minluda monuat ponuatan mirangkai.





## Kanou Mamain Pomoinan Sandad



### Ning, Ning Tomuning

Ngaran pomoinan: Minliilisok

Ginumu do mamaMAIN: Limo toi ko' lobi tulun.

Tionon mamain: Id natad do lamin toi ko' id taman pomoinan.

#### Karaaralano' mamain:



Pilion songulun sumiliu momuruan. Pogitutudukon o tuntuduk. Tudukon di momuruan tisoiso tuntuduk miampai suminding "Ning, Ning Tomuning".

Isai otuduk id koowion di sinding, suhuon do mongoi lisok. Huliton do suminding gisom oolu songulun di au otuduk sumiliu do mogiigihum.



Daamot mogihum do lisokon, mungkodom i mogiigihum om mongintob gisom 20 toi ko' lobi id torigi sabaagi stesen do rikoton di minongoi lisok. Ihumon gisom oihum ngawi ii minongoi lisok.

Nung okito i luminisok, nuru do roiton di mogiigihum ngaran di noihum om migusa mongoi id stesen. Nung kopogulu i mogiigihum korikot id torigi, ii no tohuri koihum o sumowoli mogihum. Huliton mamain gisom apaasan ngawi do mamain.



Au kawasa minliilisok ontok doungotuong tu ngoyon kaka lisoko' do rogon.

4.4.1 (i)  
4.4.2 (i)

#### Nuut Mongingia'

- Suhuon o tangaanak minsingum<sub>pal</sub> mamain.
- Kawasa nogi alanan pomoinan diti do pomoinan suai tumanud korohian tangaanak.






## Kanou Momonsoi Replika Longkudi



Kakamot: Kalatas mogisuusuai warana, watang kayu di tongokoro, selotep, gunting, gam om pinsil.




Karaaralano' momonsoi:



**1** Uludon i watang kayu miagal bontuk longkudi om posokoton kayu id kalatas momoguno selotep. Sakatan nogi do kayu id disan tumanud bontuk longkudi di wonsoyon.



**2** Guntingon o kalatas tumanud bontuk di longkudi. Poloolobion do tokuri o linaab mantad ko' ii dingkai longkudi.



**3** Likobon om posorokoton o disan di kalatas id dingkai.



**4** Sindakon i longkudi momoguno kalatas suai warana.



**5** Replika longkudi di nopongo.



Mogisuusuai bontuk do longkudi milo wonsoyon miagal ko' bontuk tombolog, tulan om suusuai po.

### Nuut Mongingia'

- Suhuon o tangaanak momonsoi replika longkudi.
- Kawasa nogi alanan watang kayu tonini momoguno tinggur do piasau om momonsoi replika longkudi tumanud bontuk korohian sondii.



4.4.3 (i)  
1.3.2 (ii)  
BA: 28



# TUUNION

TEMA 2  
WINOUN TOILAN



## Kinongoho' om Tinduo'



mangagung



monurali



mimbungkau



mongulintangan



minxylophone



monompoton




1.1.3 (iv)  
1.2.3 (iv)  
1.1.2 (vi)  
BA: 29

### Nuut Mongingia'


- Suhuon o tangaanak popolombus tuunion kikonsonon noolos.
- Suhuon o tangaanak monindu tuni tuunion di norongou mantad audio.
- Suhuon o tangaanak mamarait piipiro ngaran tuunion.




### Tuunion Korohian Ku




Ngaran: Bungkau  
 Winonsoi: Poring  
 Timpu Pounion: Ontok timpu toliwang




Ngaran:  
 Winonsoi:  
 Timpu Pounion:



Ngaran:  
 Winonsoi:  
 Timpu Pounion:



Ngaran:  
 Winonsoi:  
 Timpu Pounion:




Ngaran:  
 Winonsoi:  
 Timpu Pounion:

Kawo do Tuunion



Minggoos do minluda mamain tuunion koubasanan mooli do au opunso. Kosokodung ko nangku? Nung amu, nokuro?







Pason Ponioid-Siod

Helo, kopisanangan Jack, Nokorongou oku abal di au osonong id radio kosuab. Nokotigog oku no tu minidu pogun i todu nu. Siou no kopio kumaa dikoyu sampaganakan kio.

Kopisanangan nogi Ani. O pounsikou nogi dia. Otopot iri, minidu pogun i todu ku kosodop id lamin pongusapan.

Minonigowo sumakit isido?

Yahai nga nokotigog nogi. Au alaid yau sumakit. Duo no tadau disido hilo Lamin Pongusapan Kota Kinabalu.

Siou nokopio dikoyu tu nokotimbaba kinantakan miagal diti. Alansan da ogirot om otoboi o ginawo dikoyu.

Pounsikou no Ani.

Miagal nopo.



- Pounion o turali soira haro kinaantakan minidu pogun.
- Uhupai no songkoduo ontok haro kobolingkangan.




2.2.5 (iv) c  
1.5.2 (iii)



## Kanou Mambasa

Iti nopo nga gitar. Winonsoi iti mantad do kayu. Agayo o tinan do gitar. Haro onom o tansi poinloting. Orohian oku do mamain gitar ontok timpu toliwang.




Iti nopo nga kulintangan. Winonsoi iti mantad do tambaga. Okoro o tinan do kulintangan. Songkulintangan nopo nga siam tinan. Orohian oku minkulintangan ontok tadau karamayan.

Iti nopo nga gandang. Winonsoi iti mantad do kayu om kulit tayam. Agayo o tinan om oiyang o tuni dau. Gandangan iti montok pangampot do tagung ontok haro karamayan.



Iti nopo nga bungkau. Winonsoi iti mantad do polod. Okoro o tinan dau. Orohian oku do mamain bungkau ontok timpu toliwang.

Iti nopo nga sundatang. Winonsoi iti mantad do poring. Agayo o tinan dau. Orohian oku do mamain sundatang ontok timpu toliwang.



### Nuut Mongingia'

- Suhuon o tangaanak mambasa tumanud loyuk di kotunud.





## Iloo' om Basao'

### Boros Pomogiro



Olumis **tomod** ilo gitar.  
Sipomoli oku daa nga apagon  
**kopio** o gatang dau.




### Boros Ula Topurimanan



**Orohian** oku popouni do  
bungkau ontok haro  
timpu toliwang.



### Boros Kotigagan




**Atukoi**, oiyang  
tomod o tuni dilo  
gandang!



### Boros Pongudio



**Poingkuro** karaaralano'  
momonsoi sompton  
aki?



5.3.1 (vi)  
BA: 32

#### Nuut Mongingia'

- Tudukan o tangaanak do momonsoi ayat tumanud kawo.





## Basao' om Iloo'

Ayat nuludan MSAkT nopo nga iso ayat di kiharo boros maan, subjek, adjektif kinoyonon om timpu.

Poomitanan:

Boros Maan	Subjek	Adjektif kinoyonon	Timpu
Mogowit	oku bungkau moo	hilo walai nu	suab.
Nolihuan	ku	i kasut sipoot ku	baino.



Mogowit oku bungkau moo hilo walai nu suab.



Tumanud oku muli hilo id kampung nu do baino.



Monuduk i Aki Gonsong momonsoi sompton hiti walai do suab.



Momoli i Ani do tuunion id kakadayan ontok sosodopon.



## Suato' ayat suai tumanud nuludan MSAkT.

Boros maan + Subjek + Adjektif kinoyonon + Objek


i.

ii.

### Nuut Mongingia'

- Tudukan o tangaanak mongintutun om momonsoi ayat momoguno nuludan MSAkT.

5.4.1  
5.4.2  
BA: 33





## Riulodo' om Suato'

Kumaa: [ethel@yahoo.com](mailto:ethel@yahoo.com)

Mantad: [marcia@yahoo.com](mailto:marcia@yahoo.com)

Hai, poingkuro ko no? Alansan oku do olidas ko toririmo. Siou tu alaid ku nosimbar emel i pinaatod nu di minggu nakatalib.

Babaino diti atangkangau oku po monoguang do poniisan koowion toun. Soira ko dii mongoi hiti Kota Kinabalu? Owiton ku ia tumombului id piipiro kinoyonon di kohiok do hiti.

Kawawagu diti nokoongoi oku intong do Pokiikitanan Tuunion Koubasanan mantad pogun tokou om nogi pogun suai. Ogumu kawo tuunion koubasanan di pinokito, miagal ko' **targi**, **liratu**, **tonposom**, **sundatang**, **bungkau**, **tongkungan**, **gandang** om suusuai po. Tuunion mantad pogun suai nopo nga miagal ko **phoneloxu**, **xalam**, **er-hu** om **xizambi**.

Oilaan ku orohian ko monimung do tuunion koubasanan mantad pogun suai. Haro piipiro tuunion binoli ku montok tutungkap ku dika ontok tadau kinolodion nu.

Ba, alansan osoosogit ko toriirimo kio. Gisom kopiromut kawagu suai tadau.



## Onuai sisimbar boros pinisuhat id siriba.



Word search puzzle grid with musical instrument icons:

			S						G
X		I			h				
									n
					T				
		o		B				k	u
					r				
									g
S			d		t		n		
							i		

3.1.2 (vi)  
3.1.4 (iv)  
5.1.1 (iii)  
BA: 34

### Nuut Mongingia'

- Riulodo' om suato' kawagu o boros kiwarana taragang id buuk ponuatan.



## Kanou Monuat

Boros  
mintootoiso

iso putul boros

Pomitaan: nga, Oo

duo putul boros

Pomitaan: kopio

tolu putul boros toi ko' lobi

Pomitaan: Otopot

I Binus om i Ani monindu' nunu ngaran do tuunion.

Tinduo' da nunu  
tuunion korohian ku?

Osiisilou.

Kiluang id tinan dau.

Winonsoi mantad sumbling.

Tongusan po monguni nogi.

Ha! Ha! Otopot kopio ino Ani.

Ba, nunu o warana dau?

Poingkuro o tinan dau?

Winonsoi mantad nunu?

Sougion soira popouni?

Oo, ngaran nopo  
tuunion dino nga turali.




Tuunion korohian ku nopo nga tagung. Ogungon iti ontok tadau karamayan. Ogumu tulun oimbayat do sumayau soira kouni o tagung. Songkoogungan nopo di poinggonop nga turu tinan.


Nunu tuunion di korohian nu? Nokuro?



3.2.1  
BA: 35







Nokuro tu oponsol tokou minsingilo tuni do tuunion koubasanan?



4.1.4

**Nuut Mongingia'**

- Momonsoi o tangaanak do piipro tinimungan id kalas.
- Suhuon o tangaanak mogibooboros id tinimungan montok mongintutun tuunion tinaru tumanud tuni i pinorngou.



## Iloo' Dikoyu

### Kawo do Tuunion

sompoton

turali

tagung

winonsoi:  
tou, sumbling,  
tuai, sopinit.

winonsoi:  
sumbling

winonsoi:  
tambaga

Kogunoon:  
- Pangampot do  
suminding.  
- Gunoon ontok  
haro karamayan.

Kogunoon:  
- Pangampot do  
suminding  
- Gunoon ontok  
haro kinaantakan.

Kogunoon:  
- Gunoon ontok  
haro karamayan.  
- Gunoon soira  
haro kaantakan.



**Ihumon o koilaan kokomoi kawo tuunion suai ko' id sawat maya internet.**

**Poomitanan:**


sundatang

kulintangan

<http://www.sabah.edu.my/skm015.wccd/muzik.htm>

#### Nuut Mongingia'

- Tudukan o tangaanak do monoriuk koilaan kokomoi tuunion koubasaan suai ko' id sawat.





## Kanou Popouni do Tuunion



4.4.2

### Nuut Mongingia'

- Tudukan tangaanak do popouni kawo tuunion koubasanan i oilaan di mongingia' toi ko' tangaanak.
- Pokitonon o tangaanak audio visual poingkuro popouni tuunion koubasanan maya youtube.





## Kanou Momonsoi do Replika Tagung

Posod<sup>u</sup>iaon o kakamot:

Butul polositik, gaam, gunting, kalatas kiwarana om warana.

Laang do momonsoi:


- 1 Putulon boogian id siriba do butul tiinumon.



- 2 Somboliko' o tuwou do butul.



- 3 Posokoto' o kalatas kiwarana id posorili do puntungan butul polositik.



- 4 Tundulon ilo kalatas gisom koimbulai bubud tagung.



- 5 Wansayan do tinggayan.





# PADSAKAYAN

TEMA 2  
WINOUN TOILAAN



Kinongoho' om Tinduo'



## Padsakayan Awasi

Mirak-irak i Sungkayan  
Humuyud do **oulud**  
Intutunai padsakayan  
Id tindal waig om tawan.

Tulud-tulud kapal tulud  
Mantad pogun do Sabah  
**Osodu** pia Kuala Lumpur  
**Orikot** ku i kasari.

Kohur-kohur dilo luri  
Mamarangkat kakamot  
**Awagat** toi ko **ogumu**  
Ouhai popowalieu.

Gaud-gaud do padau  
Sumoborong do bawang  
Mogot-logot mamagaud  
Osoborong ku bawang.

Mutut-tutut koritapui  
Anaru om osiau  
Gompio padsakayan  
Kada tokou rumbako.



1.1.2 (iii)  
1.2.2 (iii)

### Nuut Mongingia'

- Suhuon o tangaanak popolombus taala-ala tumanud audio.
- Onuan kointalangan kokomoi pomogunaan boros posugkuon "o" om "a".
- Suhuon o tangaanak mongintutun boros nosugkuan om mamarait boros guas id rangkap ko tolu om kaapat.
- Ponginluuban: Onuan o tangaanak do hiis suai om suhuon momorulud boros di nosugkuan.





## Sompipio'

Padsakayan

tindal: teksi

waig: \_\_\_\_\_ 

tawan: \_\_\_\_\_ 




## Roito'

kapal tulud



kapal rahat



feri



korita



motosikal



helikopter




padau



koritapui



roket



Haro padsakayan i mamantau id tindal, id waig om tawan. Sompipio' kawo do padsakayan id sawat momoguno peta pomusarahan.

### Nuut Mongingia'

- Suhuon o tangaanak mamarait ngaran padsakayan tumanud kawo id peta pomusarahan.
- **Ponginluuban:** Suhuon o tangaanak mogihum ngaran padsakayan suai om suatan id buku tonini.





## Basao'

### Noiduanan Baas

Hilo id terminal padsakayan i Adi om tapa' disio. Sumakai daa yolo do baas mongoi id kotogisan. Intong no yolo do jadual kapamanahan baas.

Tapa': Adi, noiduanan kito no do baas. Jaam kawalu dounge suab no. Kano mongoi sakai do teksu.

Adi: Kano no apa'. (Ongoi no yolo ruba di doribo teksu).

Tapa': Gundohing, mokiadod daa yahai hilo kotogisan.

Doribo: Kotogisan do nonggo?

Tapa': Au oku koilo ngaran dii nga haro iti peta tinahak tambalut.

Doribo: Oo, ba. Sakai kou no. Ngoyo' ku yokoyu pootodo'.

JADUAL KAPAMANAHAN BAAS SRI BUNGA		
BAAS	TIMPU MAMANAU	PAKAYAAN
BUTIA	7:00 dounge suab	Kotogisan Parak
ANAS	7:00 dounge suab	Kotogisan Sindak
LENO	7:00 minsosodop	Kotogisan Parak



### Peta Rumikot id Kotogisan

Ponuduk :



bawang




Sunsuyon



puun piasau



kotogisan



Mantad terminal, tumanud **Ralan Taki** gisom korikot id **Ralan Kogut**.

Kumilong ponong wanan. Ogumu o puun piasau id gibang om wanan dii ralan. Katalib po do sunsyon, sumuang do ralan tonini ponong gibang. Okito no i kotogisan id tempok di ralan.



**Boros Sokomoyon: kumilong – lumisang tonini – tokoro**

2.3.1 (iv)  
1.4.1 (ii), (iii)  
BA: 38

#### Nuut Mongingia'

- Tudukan o tangaanak monoinu om popoboros toilaan kokomoi jadual om peta.



## Ijao' om Polombuso'

### Nawaawayaan Ku



Ontok kapanaandakan tatau kagabasan, **nakatanud** i Adi di tapa' disio **minongoi** tombului id Kuala Lumpur. Suminakai yolo do **tekxi** kuminaa id tutubpoon kapal KKIA.




**Korikot** no yolo id tutubpoon kapal, ogumu tomod o padsakayan do hilo. Haro **van**, **korita**, **motosikal** om suusuai po. Haro mongoi **papaatod** om haro nogi mongoi pamaramit do tulun korikot.



Korikot nopo yolo id Kakadayan Tagayo Kuala Lumpur, ongoi no yolo id hotel. Au yolo **miningkala**id do hilo. Ongoi no yolo intong do pokiikitanan **jet** susumangod om **korita kabal**. Songkulapis-kulapis om sanggara-gara po ngawi ii tulun mintong do oimayaan. Ii no nawaawayaan di au olihuan di Adi.



Proton Saga generasi koiso nopo nga korita di kumoiso winonsoi doid pogun tokou om pinoimagon di 9 Madas 1985.



Ounsikou i Adi suminakai do kapal tulud tu ii no kumoinsan nogi disio nakasakai.



Maamaso di kapal tumulud, intong no i Adi id soliwani. **Koluung** isio do rahat di osiwang. **Ongokoro** no kokitanan di tongopadsakayan id rahat miagal do **kapal rahat**, **padau** om **bot**.



Korikot id KLIA, sakai no yolo do **koritapui** ERL kuminaa id Kakadayan Tagayo Kuala Lumpur.

2.1.2 (iii)  
2.3.1 (i)  
1.3.3  
BA: 39

#### Nuut Mongingia'

- Suhuon o tangaanak monoinu om popolombus nawaawayaan diolo sondii kokomoi uhu.
- Suhuon o tangaanak monoinu ijaan om kopolombusan do boros nosugkuan.
- Tudukan o tangaanak kokomoi boros guas do boros nosugkuan.





## Iloo'



Monombosikol i Daren mantad kadai. Minomoli isio do fail montok taka disio.



Sumakai i Sureen do feri kumaa hilo Pulau Labuan. Agayo i feri om ogumu tulun korumpos.



Sumakai i Fazura om i tabang disido padau sumoborong do bawang. Pihupan diolo mamagaud mooii do osikap kosoborong.



Poinsakai i Lee Lian om tina' disido do bangkar. Mintong yolo kinolumison flora om fauna id disan do bawang.



## Pinsingumbalai popolombus boros kipimato noolos 'f'.




feri




flora



fauna



fail



filem


### Nuut Mongingia'

- Unsubon o tangaanak mogihum boros suai i kitimpunon pimato f.
- Suhuon o tangaanak monuat boros kipimato f id buuk ponuatan.



## Intutunai om Sorikuludo'

pogotulan




soromin

numbul plat

lampung

totobon




trak

rim bulandai

lampung brek

tirikohonon



tiigitan


bobosi

ponukod


dawai bulandai



## Pinsingumbalai monoriulud.



tan/tii/gi



ti/ho/ri/ko/non

3.1.2 (iii)  
BA: 41

### Nuut Mongingia'

- Suhun o tanganak minsingumbal mongija tumanud putul boros om polombuson miampai pomoroitan di kotunud.



## Luri Tapa' Ku



Tapa' ku nopo nga haro songinan luri. Gunoon di tapa' ku ii montok mogihum kousinan. Tikid tatau, haro nopo tulun momolohou di tapa' ku do mangakat kakamot.

Insan tatau, nokorikot i     dahai. Minokihup isio mangakat do     lamin disio kumaa lamin wagu. Ogumu kakamot diolo. Haro mija, sofa, lamari om suusuai po.

Pogihupai no dahai     i tongokakamot id luri. Olunggu ginawo ku tu kopitongkiad di sombol. Sundung po miagal dii, ounsikou oku tu nakaanu yahai     diolo.

Monongkotoluod i sombol dahai tu nakagaan o kalaja diolo     do kakamot. Nung aiso o luri, osusa yolo     di tongokakamot diolo.

momolohou

sombol

kakamot

pinapasakai


mangakat

monguhup

popowaliu

### Nuut Mongingia'

- Suahun o tangaanak do monuat teks id buuk ponuatan.







## Tinduo' Sundait

### Sundait Padsakayan



1

Ginumu-gumu do korita,  
nunu korita aiso bulandai?

2

Aiso talad ku nga osodu otulud ku.  
Isai oku?

3

Gayaton po tikiu ku, kapanau oku nogi.  
Tinduo' oku.

4

Anaru tinan miagal tulanut,  
tinan ku mogiputul-putul. Roito' oku.

5

Mononsukud nogi do poundorong, au nogi  
mononsukud do mamanan. Nunu oku?

4.2.1 (ii)  
BA: 43

#### Nuut Mongingia'

- Suhuon o tangaanak monupu sundait songdii.





## Kanou Momolukis Poster

Nakatanud i Serlin id piboi'an momolukis poster kokomoi sundait. Iti no poster winonsoi disido. Tinduo' dikoyu nunu o sisimbar dilo?



### Nuut Mongingia'

- Suhuon o tangaanak momonsoi iso poster kokomoi sundait mantad bolikan 63 i korohian diolo. Kawasa nogi yolo monupu sundait sondii kakomoi padsakayan.







# TANOM POSORILI

TEMA 2  
WINOUN TOILAAN



## Polombuso Sinding



### Tanom Koupusan

Tusak bunga  
Mungkalad **ot**itiu tadau  
**T**unguhan ku  
**O**ruhai do kosurut

Otomou roun  
Sokoon do kolibambang  
Oitom tana  
**P**osurut do tanom ku

Korus

Tusak-tusak bunga  
**T**opion do kolibambang  
Ponindak do **p**osorili  
Tanom koupusan ku

*Loyuk om roiton sinding  
Sinupu di: Pierre Corneille*



1.1.2 (viii)

#### Nuut Mongingia'

- Suhuon o tangaanak mokinongou om modsinding.
- Mamarait boros nosugkuan.






### Nunu i oponsol montok tanom?

#### Binabang tadau

Monguhup tanom momonsoi takanon sondii maya proses fotosintesis.



#### Waig

Gunoon do mongilag rumuyou o tanom.

#### Tongus

Karbon dioksida mantad tongus oponsol montok proses fotosintesis.

### Nunu po i oponsol montok poposurut tanom?

#### Nuut Mongingia'

- Suhuon o tangaanak momogonop peta pomusarahan id buuk aktiviti.



## Iloo' om Roito' Tumanud Putul Boros

### Puun Piasau Mogisuusuai Guno




**roun**

- Wonsoyon ketupat.




**papa**

- Gunoon id pomoinan migayat-gayat.



**watang**

- Wonsoyon sunsuyon.



**tinggur**

- Wonsoyon timuhau.



**tua'**

- Waig tua' piasau wonsoyon juus.



### Uludo' putul boros sumiliu boros di kotunud.

1. un/ro



3. mut/ga



2. gur/ting



4. a'/tu



5. pa/pa



2.2.2 (viii)  
3.1.2 (viii)  
BA: 46

#### Nuut Mongingia'

- Suhuon o tanganak mongija om popolombus boros maya putul boros.
- Suhuon o tanganak mambasa ayat kokomoi kogunoon piasau.
- Suhuon o tanganak mogihum kogunoon suai do piasau.





Id Tomu



1  
Piro di winagat dino?

3  
Soira kito muli?

2  
Nunu tua' dilo?



Ayat pongudio nopo nga gunoon soira mongudio isoiso ahal. Onuan do tanda pongudio (?) id kolimpupuson do ayat.

Intangai dikoyu ilo gambal om suguto' kawagu karaaralano' popolombus ayat pongudio maya audio.

4  
Isai ngaran nu?

5  
Nokuro tu apagon gatang diti?

6  
Nonggo di poyanan diti?

2.2.4 (ii)  
BA: 47

**Nuut Mongingia'**

- Suhuon o tangaanak popolombus ayat pongudio.
- Suhuon o tangaanak sumugut maya audio.



## Basao' om Gonopo' Koilaan

Maamaso di Amin momoli id iso kadai, nokokito isio do iso produk. Uhpai isio maganu koilaan mantad label produk winonsoi mantad tanom i bolion disio.



1. Gunoon o produk diti montok \_\_\_\_\_.
2. Winonsoi o produk diti mantad \_\_\_\_\_.
3. Oguno gisom do \_\_\_\_\_ o pongugad nondui diti.
4. Gatang nopo do produk diti nga \_\_\_\_\_.
5. Kisuang do \_\_\_\_\_ o produk diti.

### Nuut Mongingia'

- Suhuon o tangaanak momogonop ayat om suaton id luuk ponuatan.







## Iloo' Boros Ngaran

### • Boros Ngaran Poimbida

Morujuk do ngaran poimbida montok kakamot, tulun, kinoyonon om timpu. Suaton miampai momoguno pimato tagayo id kotimpuunon boros.

### • Boros Ngaran Koizaai

Morujuk do kakamot toi ko' ahal di umum o ula dau.

### Poomitanan:

- Tuminombului i **Daren** om **tambalut kalas** dau hilo id **Taman Pertanian Lagud Seberang, Tenom**.

Boros Ngaran	Boros Ngaran Poimbida	Boros Ngaran Koizaai
Tulun	<b>Daren</b>	<b>tambalut</b>
Kinoyonon	<b>Taman Pertanian Lagud Seberang, Tenom</b>	<b>kalas</b>



## Roito' boros ngaran koizaai om boros ngaran poimbida id teks.

Iti nopo nga lamin paganakan di taki ku, i Rundaki. Lamin nopo diti nga id Kampung Tiphoh.

Nosorili do tanom o lamin diti. Orohian tomod i taki ku momutanom id sorili do lamin. Minananom isio do tamatus id pasu, layo id winatang om langgayung id polositik.

Haro nogi tanom sumuni di kiwaig miagal siongsoi om kangkung id winokok-wokok poindoros lamin di taki ku.



Soomonu, mongoi i taki ku potomu do kinotuan. Sumakai isio do korita di sombol dau, i Linus. Uhupan di Mamai Buliga i taki ku do papataran kinotuan.





## Iloo' Boros Nosugkuan



Boros kiwarana nopo nga boros maan nosugkuan dohuri.

on Boros maan montok isoiso ponuhuan miampai momoguno posugkuon dohuri-on. **tukodon** – tukod

an Boros maan montok monguhup sosongulun miampai momoguno posugkuon dohuri-an. **ihangan** – ihang



## Pinsingumbalai.



1. Kakat iti pasu do poulud hilo.

2. Tunguh ku ilo puun tamatus.

3. Sasad ku do pomoluhub ilo puun tamatus.

4. Upu no ilo tua' tamatus di noonsok.




### Nuut Mongingia'

- Porotion o tangaanak kokomoi boros maan nosugkuan.
- Suaton do tangaanak kalaja id buuk ponuatan.






## Roito' Kopomoroitan Ginumu




sanlapak

sadur




songinan




sonridis



sontulai




punti



sonsopo



## Roito' ngaran om polombuso' kopomoroitan ginumu montok gambal id siriba.



songinan



sompuru



sanlapak



sanlangod



sonwongkos

5.5.2

### Nuut Mongingia'

- Suhuon o tanganak mambasa om mamarait kopomoroitan ginumu.



## Iloo' Format Monuat Suat Kiriman Au Arasmi

*Kampung Pangalat,  
Kaban Suat 129,  
89909 Tenom  
Sabah.*

Alamat di minonuat om  
Tadauwulan

*30 Momuhau 20...*

*Tambalut ku Fazura,  
Kopisanangan kumaa dika. Nunu abal nu?  
Alansan oku daa do osoosong ko i'.*

Ponogulu:  
Ngaran tambalut muhot  
abal om kalansanan

*Nunu maan nu ontok tadau  
koundarangan sikul diti? Otumbayaan oku  
do nopongo nu no i pasu mantad kakamot  
pomudalian kawagu.*

Tonsi 1:  
Popoilo aktiviti

*Minomonsoi oku do pasu mantad  
kongkob piasau. Nuhupan oku di tapa ku.  
Linuangan om tininggayanan ku do tali i  
kongkob, maan posowito'. Tinanaman ku  
nogi do bunga sembilan i pasu.*

Tonsi 2:  
Popoilo aktiviti

*Lansanon tokou di mongingia'  
kalas do monguhup poposindak di kalas  
tokou. Kaanu tokou nogi do monokodung  
abaabayan 'Hari Alam Sekitar' i pohoroon  
tikid toun id sikul tokou.*

Tonsi 2:  
Popoilo kinaantakan

*Alansan oku daa do kaanu ko popokito  
do gambal pasu nu maya suat tisuli nu  
doho. Andadon ku i suat nu. Ba, hino ko po  
do naamot. Kotoluadan.*

Pomupus:  
Kalansanan

*Mantad doho,  
Marissa*

Ngaran minonuat



### Nuat Mongingia'

- Suhuon o tangaanak mambasa teks.





### Monilib Parai


Monilib tapol do parai nopo nga iso kalaja di kalajaon soira koomot do parai. Koubasan do mogitaatabang ontok popoindalan do kalaja diti.

Haro momoguno do raya toi ko' rilibu ontok monilib do parai. Winonsoi iti mantad poring. Poinawaton o raya toi ko' rilibu kisuang do parai om paarab-arabon i parai naamot do madsarup. Otilib i tapol id sodu om aratu id sasahau i parai kitonsi.



Haro nogi momoguno do kipasan parai. Kipasan diti winonsoi mantad kayu. Agaan om oruhai opongo kalaja monilib parai momoguno do kakamot diti. Au tagal magandang madsarup. Soira nopo do turugon i kipas nga koobus nodi tongus om otilib nodi i tapol.

Osodu kotilibon di tapol tu agaan. I tonsi tu awaawagat nopo nga aratu om kosuang id sasahau.





### Timpu Mongomot

Ounsikou o mananamparai ontok orikot timpu mongomot. Ogumu karaaralano' do mongomot tumanud korohian sosongulun. Haro i orohian mongomot momoguno do linggaman om haro nogi i momoguno do gogorib.

Linggaman nopo nga kakamot pongomot di onini om agaan. Onggomon o tinggayan di linggaman om pokorobon i tarom di rawo do parai. Posuargon i noomot id wakid, basung toi ko' nunu nopo poyanan i kosudong. Ogikon i tomot do popitongkiad di tupu om kurulu.



linggaman



momolinggaman



mongogik

Gogorib nopo nga sinupu mantad bosu pinokilong om linampis. Pokorobon do guas parai o gogorib diti. Pountunon i parai di nogorib. Parai nopo di nogorib nga mitonggoi do guas om roun.

Koomot po om maan nodi poloposo' i parai. Songgolon i guas parai om poloposon id palalapasan do popitongkiad di tupu om rahami.




gogorib



momogorib



papalapos parai id palalapasan







# PAKALAJAAN

TEMA 3  
WINOUN SUSUYAN



Polombuso'



Audio 28



Audio 29


## Kalaja Paganakan Ku

Tapa ku **songulun** mongingia  
Mongoi sikul kosuabon  
**Mongia** Boros Kadazandusun  
Mooi do au olihuan boros.

Tina ku songulun noos  
Kumalaja id lamin pongusapan  
**Oomis** ngingis tikid timpu  
**Kolihis** ginawo di sumakit.

Mamai ku songulun pulis  
Manambasaan do saragam  
**Mantamong** koumoligan tokou  
**Mamagakom** tulun taraat.

Taki ku monginginsada  
Mongoi id rahat **sumakai** padau  
Kaanu sada ounsikou ginawo  
Pataranon **kaanu** do tusin.



**Pantango' tokou no nunu nopo pakalajaan di tosonong.**

1.1.2 (ii)  
BA: 53

### Nuut Mongingia'

- Suhuon o tangaanak sumugut loyuk id audio tumanud loyuk "Nenek-nenek si Bongkok Tiga".
- Suhuon o tangaanak minsingumbal popolombus ayat tumanud loyuk di kotunud.
- Uhoton o tangaanak kokomoi woyo toluud mantad pibarasan.





## Monginginsada' di Obintoluod





Ai, miau po ilo koruk!

Alaid moti apatai o koruk id tinda. Onuo' no wokon diti sada. Posuango' id baladi nu.



Atukoi, ogumu di patahakon nu doho! Okon ko pataranon nu iti?


Onuo' nopo. Haro po sambaladi siningguunan di tanak ku hilo po dohuri.




Ba, pounsikou. Wanadan ko no daa do Minamangun.

Miagal nopo.

Ah Chong, posunudo' iso woyo toluud i oilaan nu mantad pibarasan diolo?



Nuru sumuau om au okolit kumaa tulun suai moo do kogirot pogiombolutan.



1.5.1 (iv)  
1.3.4  
BA: 54

**Nuut Mongingia'**

- Suhuon o tangaanak sumugut loyuk id audio.
- Id soroduuduo, suhuon yolo misingumbal popolombus ayat tumanud loyuk di kotunud. Uhoton o tangaanak kokomoi woyo toluud mantad pibarasan.





## Basao'

Nunu kalaja iman-imanon diolo?

susuminding

susumangod

magagansak

mongingia'

dokutul

doribo



Iloo' peta pomusarahan id siriba.

kumalaja

Faktor popiromut

mongingia'

mongia'

as

susuminding

suminding

as

susumangod

mongumolig

as

magagansak

magansak

as

dokutul

mongusap

as

doribo

papapanau


as

korita

### Nuut Mongingia'

- Suhuon o tangaanak mongija om popoboros kawo pakalajaan.
- Uhoton o tangaanak kokomoi kalaja iman-imanon diolo.
- Suhuon tangaanak monoinu om popolombus boros nosugkuwan kiwarana id peta pomusarahan. Suhuon yolo mongintutun boros guas.

2.2.2 (ii)  
2.1.2 (ii)  
5.3.1 (ii)  
BA: 55








## Ilo'

**Ayat Mintootoiso** nopo nga kiwaa iso klausa, i kikonstituon do iso subjek om iso predikat. Ayat nopo diti nga au momoguno do boros popionit.

Poomitanan: Monguud do nipon i Dokutul Sani.

Predikat	Subjek
Monguud do nipon	i Dokutul Sani.



I Mamai Gapin nopo nga songulun mongiingindapu di nointutunan do opuhawang id kampung dii.  
**Papadagang isio mogikaakawo kakamot lotirik.**



Tinanon ku nopo nga songulun noos di osuau om abagos. **Pakalaja isido id lamin pongusapan.**



Pakalaja i James sabaagi mongingia id SK Wakid.  
**Mongia' isio Boros Kadazandusun.**



Maamaso po i Jason om tadi disio sumikul.

Kiiman-imanon - injiniol lotirik



**Nonggo tiso ayat mintootoiso? Posunudo' kumaa tambalut.**



1. Mananom i Mamai Sumpin do kinotuan.
2. Mongupu i Salia om i Maurin do tua' lado.
3. Nohuyan tomod ilo kuukumalaja.

5.4.4 (i)  
BA: 56

### Nuut Mongingia'

- Poiloon o tangaanak struktur do ayat mintootoiso.
- Tudukan o tangaanak mongintutun ayat mintootoiso id teks.



## Iloo' Rati Tukadan

**Tukadan:** Muli kamps barait



**Tukadan:** Osogit tonggom



**Tukadan:** Lampas dulud



**Tukadan:** Manamus tunturu



**Tukadan:** Bohung tana



**Kodou tulu** ko no. Suhuon nogi balajal, mamaamain nogi. Osusa moti kaanu kalaja nung aiso toilaalaan.

### Nuut Mongingia'

- Onuan nogi yolo ponontudukan kokomoi tukadan. Suhuon o tangaanak mogibooboros om monindu rati do tukadan mantad gambal pongunsub.
- Posunudon do mongingia' rati tukadan id kolimpupuson pibabaaran.





## Pisudongo' om Suato'

### Paganakan di Shanti



Tapa nopo di Shanti nga songulun upisol bumba. Kibasaan isio kiworok tarangang. Kalaja nopo disio nga momisok tapui di koligogon.



Iti nopo nga

Pakalaja isido

Monongapron isido

Magansak isido

- id restoran.
- soira magansak.
- taka di Shanti.
- sabaagi songulun magagansak.



Tabang nopo di Shanti

Kalaja nopo disio nga

Monontupi isio

Oopus i Shanti

- monupu do mesin.
- montok mantamong kumoligan.
- nga songulun injiniol mekanikal.
- dii paganakan disido.



## Simbaro'

1. Nuru do manambasaan saragam o bumba id kalajaon diolo.

Nokuro?

2. Monontupi i magagansak soira magansak.

Nokuro?

3.3.2  
BA: 58

### Nuut Mongingia'

- Suhuon o tanganak monuat ayat di nokopisudong sumiliu panganan id buuk ponuatan.





## Iloo' om Suato'

Ponuatan rencana naratif nopo nga ponuatan montok monusui isoiso **kinaantakan** toi ko' **nawaawayaan** i posusuyon kawagu. Uludon o ponuatan tumanud peta pomusarahan id siriba.



Osuab oku po minosik mantad ko' i koubasan. Otuutuong po om pootodo' oku no di tapa' mongoi sikul tu mongoi isio tombului hilo kolinik id kokompungan.

Ponogulu

Korikot oku id sikul ontok jaam konom dongsuab. Aiso po tangaanak suai nokorikot. Ii nogi monguungumolig sikul o koruhang ku. Irikau oku no id kantin magandad di tongotambalut.

Tonsi: 1

Tigog do korongou ku tuni miagal kakamot naratu mantad id suang linimput makmal sikul. Siilo oku nunu ii norongou ku. Pomorulan oku no minongoi ponoluku. Kokito ku miagal do piipiro tulun do hilo.

Tonsi: 2

Ngoyo' ku no sunudai i monguungumolig sikul. Kotigog isio om romuto' no disio o pulis. Au alaid, korikot no o pulis. Nagakom di pulis duo tulun manaanakau id suang makmal.

Tonsi: 3

Ounsikou tomod oku tu nakaanu monguhup mantamong koumoligan sikul. Ii no nawaawayaan di au ku milo lihuan.

Pomupus



### Nuut Mongingia'

- Sunudan o tangaanak kokomoi format ponuatan.





Ilo'

## Pongindopuan Poguugulu

Nosusu i todu di Serlin ontok di toun 1938. Asanagan i Serlin mokinongou sorita di todu disido kokomoi kopoposion di pogulu po. Insan tadau, ponorita no i todu kokomoi pongindopuan di tokoro po isido.

Poingion yahai id iso kampung id lapai do konuluhan. Asaru oku tumanud di tina ku mongoi badi id kakadayan. Mintana yahai om boboon dahai i pobodion miagal ko' kinotuan, sigup om manuk momoguno wakid.

Korikot nopo id badi, koruba no yahai di mongiingindapu mantad disan do rahat. Papataran yolo do tusi, sada', basaan om suusuai po.

Ontok nopo dii nga okuri po tusin do gunoon. Apagon o gatang do tusin di pogulu po. Nung haro tusin dahai do soringgit, kaanu no yahai momoli do basaan, tusi om sada rahat.



Somoonu nopo nga pogiolonon nopo dahai i tongopobodion. Nung momoli yahai do tusi, mogihum no yahai di papataran do tusi i orohian momoli kinotuan. Pilonon nopo dahai i tusi om kinotuan.



## Pogibaabasai.



1. Nunu pataranon di todu di Serlin id badi? 🗨️
2. Poingkuro yolo momoli id badi? 🗨️
3. Nunu pisuayan do pongindopuan di poguugulu om timpu baino? 🗨️

4.3.1 (i)

### Nuut Mongingia'

- Suahun o tangaanak minsingkono miagal id badi di poguugulu.






## Kanou Momonsoi Buuk Tagayo

Kakamot: kaad manila, gunting, warana, selotep, pinsil, ponobuk kalatas, reben.


Karaaralano' momonsoi:



1. Lopion i kaad manila kumaa apat boogian. Guntingon kumaa duo boogian.
2. Sakatan do selotep id disan di kalatas. Tobukon id disan di kalatas.
3. Uludon i kalatas miagal do buuk om kagasan toluwau momoguno do reben.
4. Suaton o sorita id bolikan gibang om lukison gambal kokomoi sorita id bolikan wanan. Goyoon o ponunuat di susuyan.
5. Suaton o uhu id kulit dii buuk om lukison gambal di kosudong do uhu. Waranaon om sindakon tumanud korohian.
6. Buuk tagayo di nopongo. Milo nodi gunoon monusui susuyan.

### Nuut Mongingia'

- Suhuon o tangaanak momonsoi buuk tagayo diolo sondii momoguno sorita kokomoi pakalajaan.
- Suhuon o tangaanak monusui sorita kumaa tambalut diolo miampai ponguhupan buuk tagayo diolo.







# TAYAM

TEMA 3  
WINOUN SUSUYAN



**Kanou Monudawil**



## Tayam Tolias

Monikid kosuabon  
Monguni lo tombolog  
Mogikaakawo tuni  
Momolihis do ginawo.

Kiwotik wulu dau  
Kitinduk om kibulang  
Mungkalad tikiu dau  
Tubou o ngaran dau.

Osiaw do manangkus  
Iri no i tomuning  
Ogorot do mintopik  
Iri nopo nga bosing.

Tayam mangakan paha'  
Bohuang o ngaran dau  
Outong tontut dau  
Iri nopo nga tudu.


*Sinupu di : Charles G.*



I.1.2 (xi)


**Nuut Mongingia'**

- Suhuon o tangaanak mongintutun boros di nosugkuan;





# Iloo' om Gonopo' Pimato'



## Nunu piagalan do godingon om karabau?

### Nuut Mongingia'

• Suhuon o tangaanak do popolombus kawagu toilaan mantad bahan pongunsub.



Iloo'



## Godington Pigmi Borneo



### Godington Pigmi Borneo

Ngaran tayam:



Poingion id:



Godington di nosukod nopo nga

i) Kiumul:



ii) Kikinawas:



iii) Kiwinagat:



## Bohuang Paha

Ngaran tayam:



Bontuk tolingo:



Ninaru tikiu:



Guno do dila:



Warana wulu:



Taakanon:



1.4.2

### Nuut Mongingia'

- Suhuon o tangaanak do monokod om popolombus koilaan toponsol mantad teks audio.





## Mokinongou om Mimboros

### Ayat Ponuhuan



Ayat Ponuhuan nopo nga ayat popointalang toi ko' popoimbulai do isoiso koimaan om poboroson kumaa tulun koduo.


#### Ayat monuhu

Gunoon soira popoboros miampai tudu manahak iso ponuhuan toi ko' kapasarahan.

1. Pogidu mantad hiti!
2. Bobogo' ilo tulanut.
3. 


#### Ayat pogoduhan

Gunoon montok mogodu sosongulun do momonsoi isoiso ahal.


1. Kada panakau.
2. Au minog do magansak.
3. 

#### Ayat pokionuan


Gunoon soira monuhu tokou toi ko' mokianu.

1. Ongoi no akan oi ambalut.
2. Alansan yahai do au kou minggangau.
3. 

Akanon po iti do gulu.



Kada pingonuo' tontolu' ku.



Alansan oku da osiau ko miagal doho.



#### Nuut Mongingia'

- Suhuon o tangaanak do misingumbal popolombus mogikaakawo ayat ponuhuan miampai momoguno do loyuk di kotunud.





## Polombuso'

### Laba di Kondiu




Oimayaan i parai tu asapou, oonsi om noonsok o tua' dau. Insan tatau korikot no i Ikus minongoi pangakan di tua' dau. Otogod yau di Ikus nga aiso no pokukurayan.

Kayahan nopo di i Ikus, undorong no yau id timpak do tuod. Naamot dau do poundorong, au yau nokopuriman do poingimpa dau i Ulanut.




Pomorulan-rulan no i Ulanut minongoi insomok di Ikus. Koinsomok nopo i Ulanut di Ikus, singabo' no dau i Ikus.

Au podi notolon di Ulanut i Ikus, tigog po nga korikot no i Kondiu minongoi ponimbit di Ulanut. 



### Nunu pionitan dilo sorita om gambal id siriba?



1.5.3 (ii)  
BA: 62

#### Nuut Mongingia'

- Suhun o tangaanak popolombus sorita tumanud do gambal id sawat.



## Ijao' om Polombuso'



**Nunu tayam di korohian nu? Nokuro?**



### Nuut Mongingia'


- Suhuon o tangaanak do mongija om popoboros mogikaakawo boros.








## Sada' di Otiil



I Piko nopo nga sada' di otiil tomod. Ogumu tambalut au orohian dau tu asaru mongudut.



Insan tadau, maamaso diolo maamain tigog ka pinggiak i Piko. "Hudi koritan! Koritan! **Kanou moi lisok,**" ka di Piko. Podosi ngawi o tongosada' om ongoi no yolo lisok. "Ha! Ha! Ha! Maan tomod ku ii," ka di Piko miampai miningirak.



Suai no tadau, pinopoimamang daa kawagu i Piko di tongotambalut dau. Tigog po do koulai songinan koritan mooi rapou diolo. "Haro koritan! Koritan! **Pogidu kopio Piko,**" ka di tongotambalut ngawi dau miampai minogidu i yolo.



Au otumbayaan i Piko. Andasan di Piko popoimamang dau. "Aiso bogia Koritan do hiti, kada no popoimamang doho," ka di Piko miampai minongirak. Kotigog i Piko soira noinsamakan di koritan. Osonong kopio tu nokosiwat yau do minogidu. Mantad dii, au nodi mongudut i Piko.

2.2.4 (iii)  
2.3.4

### Nuut Mongingia'

- Minsingumbal popolombus ayat momoguno ohou di otolinahas om loyuk di kotunud montok ayat ponuhuan.
- Popolombus ponguhatan montok mokianu kointalangan lobi kokomoi do teks di nabasa.



## Pisudongo' om Suato'

### I Tasu Om I Tandaha

Insan tadau minimpanau i Tasu om i Tandaha minongoi hilo talun. Minimpanau yolo gisom nasadapan. “Oi Andaha, modop kito hiti talun baino kio. Muli kito suab,” ka di Tasu. “Oo ba, milo bo,” ka di Tandaha. Minodop yolo id talun. Suminako i Tandaha id raan do kayu. I nopo Tasu nga guminupu id guas do kayu.

Soira minsusuab, koposik om poningkukuhuk no i Tandaha. Korongou nodi i Tompu kukuhuk di Tandaha. Ngoyo nodi di Tompu ihumo' tadon di tuni. Au nodi alaid, kokito no dii Tompu i Tandaha poinsako id raan do kayu. “Lintuhun da oi Andaha, hiti kito miambalut,” ka di Tompu. “Obuli bo, nga posikai po ino tambalut ku hino guas do kayu,” ka di Tandaha.



Posikai no dii Tompu i Tasu. Otogod i Tasu soira norulahan. Usigo' no dii Tasu i Tompu. Panangkus no dii Tompu do minogidu tu orosian di Tasu. Osonong ginawo di Tandaha tu nokopogidu i Tompu. Pitanud no i Tandaha om i Tasu do minuli.

Id suang pomusarahan dikoyu, nokuro tu siambalut i Tompu di Tandaha?



### Nuru momili tokou tambalut di tosonong.

#### Nuut Mongingia'

- Tudukan o tangaanak do manahang sorita' di nabasa.





## Iloo' om Suato'

Abaagi o boros ula kumaa piipiro tinimungan.

	Kawo Boros Ula	Poomitanan
1	Boros Ula Woyo	olumis, ogingo
2	Boros Ula Warana	obulou, sokulit
3	Boros Ula Pancaind <u>ara</u>	oonsom, olumis, opian, olonsi, olunau
4	Boros Ula Poingkuro	aarau, oporokis
5	Boros Ula Topurimanan	ounsikou, orohian
6	Boros Ula Sinodu	osomok, osodu

Iti nopo nga i Tandaha. **Olumis** o wulu dau tu mogisuusuai o warana. Haro warana **oitom**, **osilou**, **orin** om **aragang**. Mosik om mimpanau isio mogihum taakanon tikid kosuabon. **Aparu** tomod isio. Ogumu manuk orohian mambalut dau tu **osuau**, **okodsir** om **obinguhup**. Soira haro kobolingkaangan do tambalut dau nga **osikap** isio do mongoi ponguhup.



Iti nopo nga i Rimau. Kiburis osilou om oitom wulu dau. Orosian o tayam do mambalut dau tu orongit om obintogod. Osodu tomod tionon di Rimau. Mokirayou tomod isio tu opurimanan dau ogingo, osiau om awantang tinan dau. Podosian yau di tongotayam tu mangangakan do tayam suai.



5.2.1 (iii)  
BA: 63

### Nuut Mongingia'

- Suhun o tangaanak do papatayad om monompipi boros ula tumanud sompuruan boros ula id buuk ponuatan.





## Basao' om Gonopo'

**Boros Ponuhuan:** Boros ponuhuan nopo nga boros i oguno soira monuhu, mokianu toi ko' mogodu.

Poomitanan: **uhupai, kanou, ngoyo, kada, suang no, akan no**

### Petak Ponuhuan



#### Karaalalano' do mamain:

1. Posodiaon o dadu kinumbul iso gisom onom.
2. Suhuon o tambalut papataam dadu tumanud nuludan.
3. Gonopo momoguno boros ponuhuan di kosudong tumanud numbul id dadu.
4. Isai gulu kosimbar tolu poguhatan, iri no o kalantoi id pomoinan dii.

#### Petak 1

“\_\_\_\_\_oku mogihum taakanon suab kio Andaha,” ka di Tasu.

#### Petak 2

“\_\_\_\_\_mimpanau mongoi pogihum taakanon tinu Asu,” ka di Tandaha.

#### Petak 3

“\_\_\_\_\_koondos kopio oi Tompu mulong pia osiau ko manangkus,” ka di Tingau.

#### Petak 4

“\_\_\_\_\_da doho ilo tua' oi Andaha,” ka di Tasu.

#### Petak 5

“\_\_\_\_\_Andaha, louson moti id tindalanon,” ka di Tasu.

#### Petak 6

“\_\_\_\_\_id kandang, haro moti Tompu mangakan,” ka di Manuk minomisunud di tongotambalut dau.

#### Nuut Mongingia'

- Suhuon o tangaanak do momogonop boros ponuhuan maya pomoinan petak ponuhuan.





## Iloo'



Ogumu tayam au otumbayaan di Manuk tu **gayo kabang** tomod yau tu au koilo popoopi boros.




Oinsanan tayam id talun au orohian kowoowoyoo' di kara tu **oniba nimpusadan** dau.



**Orikot do dulaan** o kandang di putik nga alaid korikot tu odomut mamananau.



Okuri paha' notimung di bohuang nga korungod kasari montok paganakan dau tu okikit ngawi yolo. Iri no komoyon **do oogot tongom**.



Noubas no i Tandaha **monggom ninipot** mantad id buaton.



Kada ongoi ambalut di tomuning tu **lingkung barait**. Osonong id toguang nga araat id tolikud.

5.6.2  
BA: 67

### Nuut Mongingia'

- Tudukan o tangaanak mangarati do tukadan.



## Tuminombului id Zoo

Ontok timpu toliwang, minongoi i Lolin tombului hilo id Taman Zoo Lok Kawi miampai tongotambalut disido. Ogumu tutumombului rumikot mongoi intong **ngo to yam ta** id Zoo Lok Kawi.

Lolin: Ogumu no o tayam do hiti kio. Haro **nuk la pa**, **bang tam**, **nut la tu**, **log bo tom**, **da sa** om susuai po.

Serlin: Oo bo, mogikaakawo po tayam okito do hiti.

Cintia: Iti no komoyon do zoo, iso kinoyonon montok potimungan tongotayam di muri-kuri no tu mada opunso.

Serlin: Intangai ilo tombolog. Olumis tomod o wulu dau. Kiwarana do osilou, otomou, aragang om opurak.

Lolin: Oo, ilo nopo nga turipos.

Cintia: **giu ko** toi ko' **ra ka** ilo poingirikau id raan kayu?

Lolin: Ilo nopo nga kogiu. Tinan nopo do kara nga okoro ko' kogiu.

Cintia: Oporodot no kopio ilo tanak **ang hu bo** kio.

Serlin: Oo nogi bo, miagal nogi ilo tanak **ngol bo**, **ning mu to**, **sing bo** om **tung yu du ton**.

Lolin: Ba, kanou no mongoi intong do **ngon go di** hilo.




## Patayado' boros i nosoriulud.

**Poomitanan:** palanuk,



### Nuut Mongingia'

- Suhuon o tangaanak mokinongou audio om monoriulud putul boros di kiwarana.







## Kanou Monuat




miambalut  
- kinoyonon



tikid tadau  
- pogihum do paha'



monimung paha'  
- poopion



napanakau  
- olungui



minanahak sunduan  
- ounsikou



otood  
- minonguhup



## Pomonsoi pangaan tumanud gambal id sawat.

\_\_\_\_\_ i Bohuang om i Kara id iso \_\_\_\_\_. \_\_\_\_\_ mongoi yolo  
\_\_\_\_\_ id talun. Tumimpun nodi yolo \_\_\_\_\_ om \_\_\_\_\_ diolo  
tu au no alaid timpu magadau.

Insan tadau \_\_\_\_\_ paha' di Kara. \_\_\_\_\_ o ginawo dau  
nga \_\_\_\_\_ i Bohuang kumaa di Kara. \_\_\_\_\_ om \_\_\_\_\_ o  
ginawo di Kara tu \_\_\_\_\_ i Bohuang mogihum do paha' montok  
di Kara.

3.3.3  
5.4.3  
BA: 67

### Nuut Mongingia'

- Tudukan o tangaanak momonsoi ponuatan id pangaan maya ponguhupan mongingia' id buuk ponuatan.



## Kanou Manangon

### I Tingau Om I Tompu



Insan tadau minimpanau i Tompu id disan do dumo. Koruba no yau di Tingau maamaso mangahu do guas kayu. “Nunu mangan nu Ungau?” ka di Tompu. “Mangasa oku ti sondulu ku,” ka di Tingau.

“Nokuro tu asanon nu no sondulu?” ka di Tompu. “Nung atarom sondulu ku popouhai doho mindakod do kayu soira gusaon oku di Tasu,” ka di Tingau. “Amu tagal mindakod do kayu, manangkus nopo nung haro momogusa,” ka di Tompu.



“Ino no dia, au kaagal doho tu osiau manangkus. Amu kogusa doho i Tasu dii,” ka di Tompu do oondos.

Tigog ka om pongusig no i Tasu soira nokokito di Tingau om Tompu. Osikap i Tingau mindakod do kayu om panangkus i Tompu minogidu.



Nunu kolimpupuson do tangon diti?



#### Nuut Mongingia'

- Suhuon o tangaanak mingsingumbal popolombus do tangon tumanud teks om gambal.






UNIT  
10

# SONGONGI'

TEMA 3  
WINOUN SUSUYAN



## Pibarasai



### Nunu maan dilo tongosongongi'?

#### Poomitanan:

- Kilau – kumamang

1.3.2 (i)  
BA: 69

#### Nuut Mongingia'

- Suhuon o tangaanak mamarait nunu maan isoiso songongi.
- Mogibooboros koilaan kokomoi songongi'.





**Simbaro'**

Iti nopo nga kolibambang. **Kitalad** iti. **Kiwotik** do olumis. Haro onom gakod om **kisingud**.



Nunu **akanon** dino kolibambang?

**Mogontolu'** nangku ilo?

Id nonggo **ionon** dino?



**Roito' boros nosugkuan.**

Kitalad






**Nuut Mongingia'**

- Suhuon o tangaanak mamarait boros nosugkuan.
- Porotion o tangaanak do boros nusugkuan.
- Muihot om misimbar kokomoi songongi suai.





I Godu Om I Kilau



1 Patayado' topurimanan dikoyu soira nokorongou sorita dii.

i. \_\_\_\_\_ ii. \_\_\_\_\_ iii. \_\_\_\_\_

2 Isai watak korohian dikoyu id sorita dii? Nokuro?

\_\_\_\_\_

3 Patayado' pononsunudan di aanu mantad sorita diti.

i. \_\_\_\_\_

ii. \_\_\_\_\_

1.4.3  
1.5.3 (i)  
BA: 70

Nuut Mongingia'

- Suhuon o tangaanak monuat id buuk ponuatan.





## Basao' om Iloo'

Nangatan di mongingia' Sains i tangaanak Toun 3 Abaal do popoindalan pambalajalan soliwana kalas. Tinimung yolo do saraapat-apat id onom tinimungan. Mogihum yolo do koilaan kokomoi songongi' id Taman Sains.

Sinuhu di mongingia' i tangaanak do mogihum pisuayan om piagalan do tongosongongi' di okito diolo. Ogumu songongi' nokito diolo miagal do tongkub-ongkub, kolibambang, tompokikiu, tanai, kilau, nondui, pomosuon om suusuai po.

Minomili o tinimungan di Sureen do pomosuon om kolibambang id ponoriukan diolo.





Sureen: Kanou suato' tokou o piagalan do songongi' diti.

Adi: Kolibambang nopo nga haro onom gakod om kitalad.

Daren: Pomosun nga miagal nogi. Onom gakod om kitalad.

Serlin: Duo-duo songongi' diti nga tumulud om kisingud.

Sureen: Ba. Kanou suato' tokou pisuayan do songongi' diti.

Adi: Pomosun nopo nga kisingot. Kolibambang nopo nga aiso singot.

Daren: Oo no. Iri no tu moningot i pomosun. Kolibambang nopo nga amu moningot tu aiso singot.

Serlin: Tumulud ngoduo songongi' diti. Oloyo tumulud o kolibambang, pomosun nopo nga osiau.



2.3.3 (i)  
2.4.4  
BA: 71

#### Nuut Mongingia'

- Tudukan o tangaanak momili om momonsoi peta pomusarahan i kosudong tumanud koilaan isoiso teks.



### **Kolidangan Posorili**

Ontok tatau koundarangan sikul minuhup i Sureen di paganakan dau do momolidang posorili lamin.

Ogumu tomod songongi' id posorili lamin diolo. Haro kilau id suang parit om nogi poinrolot do sahap id natad lamin. Noimbulayan nogi di tina' di Sureen o tangkalamai id sahap. Nasip po kopio tu au nosingot i tina' di Sureen.

Sinobputan di tapa' di Sureen do pamatai nondui i tongotiin. Pinuhu om nuntun ngawi ii tongotiin do maan pootodo' hilo id longkod pomudolian kawagu.





Ogumu nogi tanai poingion id raan kayu di norobuk. Nuntun om tinutudan di tina' di Sureen i tongosahap om raan norobuk.

Sundung tu nohuyan yolo do kuminalaja nga ounsikou o paganakan di Sureen tu nakaanu momolidang posorili lamin. Koimaan diti nakaanu monginsud tongosongongi' koligogon om kopogowit toruol.



Gompion tokou toriirimo kolidangan posorili lamin.



2.3.3 (i)  
BA: 72

#### Nuut Mongingia'

- Momoguno koilaan id teks di nabasa montok monimbar penguhatan.







# Ijao' om Polombuso'

## Songongi' Koligogon

### Nondui



### Potiukan



**Nokuro tu koligogon iti songongi'?**




\_\_\_\_\_



\_\_\_\_\_

### Nuut Mongingia'

- Suhuon o tangaanak mongija' boros kokomoi boogian tinan songongi'.





## Iloo' Boros Mintootoiso

Boros mintootoiso nopo nga boros di au nosugkuan om aiso pongohulitan. Owonsoi iti mantad iso toi ko' lobi putul boros.

### Poomitanan:

- Nondui nopo nga songong*i'* di koligogon.

Iso putul boros	Duo putul boros	Tolu putul boros
<ul style="list-style-type: none"> <li>• nga</li> <li>• di</li> </ul>	<ul style="list-style-type: none"> <li>• non/<u>dui</u></li> </ul>	<ul style="list-style-type: none"> <li>• so/ngo/ng<i>i'</i></li> </ul>









## Pinsingumbalai

I Mamai Gabin nopo nga songulun momumutanom di aparu. Mindahu kasaasari isio id kabun dau.

Insan tadau, di maamaso isio do mamalangga posorili tanom dau, kounggar nogi dau o iso pinuwalai do moningot. Sontulud-tulud po i moningot gumusa disio.

Pugagon disio i moningot di sonsingot-singot. Modoi-odoi po isio do orualan. Mangkus-tangkus po isio do ginusa di moningot. Minongoi isio tolop di botung id doros do kabun. Sonlonit-lonit po turos dau do nosingot.

Iso putul boros	Duo putul boros	Tolu putul boros
<ul style="list-style-type: none"> <li>• i</li> </ul>	<ul style="list-style-type: none"> <li>• ma/mai</li> </ul>	<ul style="list-style-type: none"> <li>• so/ngu/lun</li> </ul>
<ul style="list-style-type: none"> <li>• </li> </ul>	<ul style="list-style-type: none"> <li>• </li> </ul>	<ul style="list-style-type: none"> <li>• </li> </ul>
<ul style="list-style-type: none"> <li>• </li> </ul>	<ul style="list-style-type: none"> <li>• </li> </ul>	<ul style="list-style-type: none"> <li>• </li> </ul>

5.3.1 (ix)  
BA: 74

### Nuut Mongingia'

- Suhuon tangaanak mogihum boros mintootoiso tumanud ginumu putul boros.
- Polombuson tangaanak boros mintootoiso tumanud putul boros.



## Basao' om Iloo'

Oilaan tokou do koligogon kopio o nondui.

Kada sangkataamai nunu nopo rinomos i kotimung waig **tu** pogontolu'an moti do nondui.



Okokot moti nondui **nung** amu momoguno pongugad nondui.

Nuru lidangan posorili **gisom** aiso tionon nondui.

Ayat nopo diti nga ayat misompuru miampai momoguno boros popionit **tu**, **nung** om **gisom**.

### Poomitanan:

• Nuru lidangan posorili **gisom** aiso tionon nondui.

1. Nuru lidangan posorili.
2. Aiso tionon nondui.

• Okokot moti nondui **nung** amu momoguno pongugad nondui.

1. Okokot moti nondui.
2. Amu momoguno pongugad nondui.

• Kada sangkataamai nunu nopo rinomos i kotimung waig **tu** pogontolu'an moti do nondui.

1. Kada sangkataamai nunu nopo rinomos i kotimung waig.
2. Pogontolu'an moti do nondui.







## Pinsingumbalai

- Suato' id buuk ponuatan.

nung

tu

gisom

- Tomison tomod i Adi.
- Nokokot do nondui.



\_\_\_\_\_



- Minomolidang do lamin o paganakan di James mantad kosuabon.
- Nopongo momolidang di doungeadau.



\_\_\_\_\_



- Osikap momolidang posorili.
- Ogumu tulun mogiuhup-uhup.



\_\_\_\_\_



- Pogontolu'an di nondui i tongotiin.
- Orohian o nondui mogontolu' id tongotiin kiwaig.



\_\_\_\_\_



5.4.4 (ii)

### Nuut Mongingia'


- Suhuon o tangaanak mambasa dialog.
- Tudukan o tangaanak momonsoi ayat id buuk ponuatan.







## Gonopo' tumanud putul boros di oulud

### Poomitanan:





Kiwotik do olumis o talad dilo kolibambang.




\_\_\_\_\_  nopo nga songongi' di koligogon.




Ogumu \_\_\_\_\_  poingion id raan do kayu di norobuk.




Ogumu \_\_\_\_\_  poinsuang do parit.



Sobputan di tapa' di Sureen do pamatai ilo \_\_\_\_\_ .

### Nuut Mongingia'


- Tudukan o tangaanak monoriulud putul boros.
- Suhuon o tangaanak monuat id buuk ponuatan.





## Kanou Monuat


Insan tadau, minindakod i Kilau do puun rangalau. Puun rangalau nopo dii nga id doros do iso botung.




Tigog ka do padsarup do tologod. Koguyu i puun rangalau om karatu nodi i kilau naanggag mantad puun dii.



au koilo kumaau-olonod-mokiuhip



kolibambang-nokorikot-pinaratu roun



ounsikou-minonongkotoluod



3.3.4

### Nuut Mongingia'

- Tudukan o tangaanak do karaaralano' mongopot sorita.





## I Tadtaru Om I Tangkalamai

Insan tatau minangalap i Kilau di toinsanai tambalut minongoi tindapou do karamayan id lamin dau. I Tangkalamai om i Tadtaru nga ruminikot nogi.


Id tindalanon, maamaso do mamananau, oloyo tomod i Tadtaru mamananau. “Oi Tadtaru, siahai no mamananau. Oiduanan kito moti,” ka di Tangkalamai. “Pogulu nopo oi Angkalamai, au oku kogusa dika tu ogumu gakod, logot-logoton ku mamananau,” ka di Tadtaru suminimbar.

“Hino ko po kio, momolihung ko po piring do korikot. Ha! Ha! Ha!” ka di Tangkalamai do momohingi-hingi. Siahai no di Tangkalamai minamananau.

Au no alaid mantad dii, korikot nodi i Tadtaru id kosusuangon do lamin di Kilau. Kokosupai di Tadtaru i Tangkalamai maamaso do mongolus kasut.

I Tadtaru nga minongolus nogi do kasut dau. Osikap do noolus ngawi i kasut dau tu okudi o gakod. Nosianan isio di Tangkalamai. Uhupai nodi disio i Tangkalamai.

“Siou dika Tadtaru tu araat boros ku kumaa dika,” ka di Tangkalamai manasal. “Au monguro. Oponsol do giroton o piombolutan om piobpinayan tokou,” ka di Tadtaru.



**Kada tokou popokoro-koro do tulun suai.**

### **Nuut Mongingia'**

- Suhuon tangaanak mokinongou audio toi ko mambasa teks.
- Pibarasai pononsundan suai i aanu mantad sorita diti.

# SKRIP AUDIO



## KOOTURAN SIKUL

(bolikan 2)

Kumaa tambalut ku Rafiq,

Nunu abal nu do baino diti? Alasan oku daa do osonong-sonong kou ii'. Osoosong oku ii' hiti id sikul kawawagu ku.

Sikul kawawagu ku nopo nga iso' sikul di nointutunan id pogun tokou. Nakalantoi sikul diti id piboi'an sikul bobos olidang om ogingo. Sikul nopo diti nga poposotol do kooturan di minog tonudon koinsanai tangaanak.

Soira id kantin, nuru muyud tangaanak soira momoli taakanon. Au kawasa do agangau. Au nogi kawasa papataam siamut id kalas, id taman om nonggo-nonggo boogian sikul.

Soira nopo doid librari nga nuru no do kumadada tu kagangau do tulun suai. Au kawasa do manangkus nung mindakod toi ko' lumintuhun tukad.

Asaru pitabangan pohoroon id sikul diti. Pitabangan momolidang posorili, momolukis mural, mananom tongobunga om nogi momonsoi sulap.

Ogirot o sokodung molohing tangaanak do nunu nopo abaabayan pohoroon id sikul diti. Iri pogi nga kalantoi kasaasari sikul diti do piboi'an sikul bobos ogingo om olidang.

Iri-iri no sorita ku kokomoi sikul kawawagu ku. Andadon ku o suat tisuli nu. Hino kou po.

Mantad dogo,

.....

Daren



## SIPOOT

(bolikan 13)

Iti nopo nga i Daren. Kiumul isio do siam toun. Poin sikul isio id SK Timpak Nabalu. Kaanangan nopo disio nga mimbuul ontok timpu toliwang. Insan tatau, nokokito isio do kopoilaan pomilian mimbuul id sikul diolo. Ongoi no isio tanud pomilian mimbuul dii. Ounsikou o ginawo dau tu nopili do mobi tinimungan mimbuul sikul. Minluda nodi yolo mimbuul tikid sosodopon tu au no alaid o piboi'an mimbuul nayatan watas Tamparuli. Nokolimbou koiso' o tinimungan di Daren id piboi'an mimbuul watas Tamparuli. Ounsikou kopio o ginawo diolo.



### SUMILIU BONTUGAN SIPOOT

(bolikan 14)

Ngaran ku nopo nga i Daren. Nosusu oku ontok 7 Madas 2011. Baino diti, kiumul oku siam toun. Mantad oku hilo Kampung Timpak Nulu. Haro onom tulun yahai do mogiobpinai. Aanangan oku do mimbuul. Iman-imanon ku nopo nga sumiliu pamain ointutunan id Asia. Baino diti, haro duo kinalantayan ku id piboi'an mimbuul. Koiso', nokolimbou koiso' tinimungan ku id piboi'an mimbuul nayatan watas Tamparuli. Koduo, nokolimbou kotolu tinimungan ku id piboi'an mimbuul id nayatan Pogun Sabah.



### PANAU ONTOK TADAU KAAMATAN

(bolikan 26)

Tuminanud i Serlin di molohing disido minongoi intong karamayan kaamatan id Dewan Kampung Wakid. Ogumu abaabayan pinaharo id karamayan dii.

Nagayat ginawo di Serlin nokokito mogisuusuai pokiikitanan taakanon koubasanan. Haro hinava, sinuko bambangan, bosou om suusuai po. Haro piipiro tutumombului mantad pogun suai mongoi umbal di tongotaakanon.

Suai ko' ii, minongoi nogi yolo intong piboi'an magansak pinarasakan sada bosungan. Haro limo tinimungan mantad mogisuusuai kampung minampayat id piboi'an dii. Nakalantoi o tinimungan koonduan mantad Kampung Sinaging id piboi'an dii.

Pogulu do minuli, minomoli po i tina di Serlin do tolu butul bosou om limo linopot takano. Minomoli nogi yolo do tindalam linompuka. Ounsikou tomod o ginawo di Serlin.



### SINDING: NING NING TOMUNING

(bolikan 41)

Ning Ning Tomuning  
Walatik kali popou  
Wantai punai rajin lisok



### TUUNION

(bolikan 43)

1. (tuni tagung) Nunu o ngaran tuunion dii?
2. (tuni turali) Nunu o ngaran tuunion dii?
3. (tuni bungkau) Nunu o ngaran tuunion dii?
4. (tuni kulintangan) Nunu o ngaran tuunion dii?
5. (tuni xylophone) Nunu o ngaran tuunion dii?
6. (tuni sompoton) Nunu o ngaran tuunion dii?





### TUUNION KOROHIAN KU

(bolikan 44)

- A. Iti nopo nga bungkau. Winonsoi mantad do poring. Pounion iti ontok timpu toliwang toi ko' ontok piboi'an tuunion.
- B. Iti nopo nga sundatang. Winonsoi mantad do poring. Pounion iti ontok haro karamayan toi ko' timpu toliwang.
- C. Iti nopo nga togunggak. Winonsoi mantad poring. Pounion iti ontok haro karamayan toi ko' piboi'an tuunion.
- D. Iti nopo nga sompoton. Winonsoi mantad sumbling, tou om sopinit. Pounion iti ontok karamayan toi ko' pangampot do suminding.
- E. Iti nopo nga tongkungan. Winonsoi mantad poring. Pounion iti ontok karamayan toi ko' timpu toliwang.



### PASON PONIOD-SIOD

(bolikan 45)

Kopoilaan suang lamin nopo diti nga notorimo dahai mantad di Gundohing Narakit Mapui mantad Kampung Kurulu, Tamparuli. Pinopoilo do minidu pogun i Sundiam Mapui di jaam koturu minsosodop id Lamin Pongusapan Kota Kinabalu. Alapon oinsanan tobpinai om waris id sodu om id somok do rumikot tu lisokon i tongotiagak Sundiam Mapui do suab ontok jaam kohopod doungeoswab id tana pamalabangan Kampung Kurulu, Tamparuli. Ingkaka no gisom kopoilaan suang lamin diti.

Ani: Helo, kopisanangan Jack. Nokorongou oku abal di au osonong id radio kosuab. Nokotigog oku no tu minidu pogun i todou nu. Siou no kopio kumaa dikoyu sampaganakan kio.

Jack: Kopisanangan nogi Ani. Oo, pounsikou nogi dia. Otopot iri. Minidu pogun i todou ku kosodop id lamin pongusapan.

Ani: Minonigowo sumakit isido?

Jack: Yahai nga nokotigog nogi. Au alaid yau sumakit. Duo no tatau disido hilo Lamin Pongusapan Kota Kinabalu.

Ani: Siou no kopio dikoyu tu nokotimbaba kinaantakan miagal diti. Alansan da ogirot om otoboi o ginawo dikoyu.

Jack: Pounsikou no Ani.

Ani: Miagal nopo.



## KAWO DO TUUNION

(bolikan 51)

Intutunai tuni tuunion diti. Nunu ngaran tuunion diti? (Tuni gitar)

(Uliton o ponguhatan id sawat montok tuunion suai miagal tuni bungkau, turali, togunggak, sundatang, gandang, xylophone, kulintangan, sompoton om tagung).



## MONGINTUTUN DO TAYAM

(bolikan 89)

### Godingon Pigmi Borneo

Godingon Pigmi Borneo nopo nga iso spesies Godingon Asia poingion id Pulau Borneo. Tumanud ponoriuk mantad Universiti Colombia, DNA Godingon Borneo nopo nga haro piagalan genetik do tinimungan godingon id Tana Tagayo Asia om Sumatera. Okito tokou godingon diti id ponong kosilahon Sabah om koibutan Kalimantan. Godingon Pigmi Borneo, i kiumul do 6 tulan nopo nga kikinawas 1.5 mito om godingon di nosukod kiumul 5 toun kikinawas 2.4 mito. Godingon diti kiwinagat 2 tan om apasi gisom 70 toun. Tinimungan diti orohian mion id disan bawang. Haro apat tinimungan tagayo nokito id pogun Sabah.

1. 110 tinan pongion id ponong sawa do Kinabatangan.
2. 900 tinan poingion id ponong sarayo Kinabatangan.
3. 300 tinan poingion id Rizab Kuposion Tolias Tabin.
4. 100 tinan poingion id ponong sarayo do Koluntang.

### Bohuang Paha'

Bohuang Paha' kisondu do palangkait. Alaab o palad dau om opinit mindakod do kayu. Wulu nopo Bohuang Paha' nga oitom, oniba om alamou. Ourod om okoro o tolingo dau. Tikiu dau kininaru 3 inci gisom 7 inci. Okoro o tinan Bohuang Paha'. Oporoi om milo ponoruon o dila soira maganu do paha'. Orhian o Bohuang Paha' do mangakan invertebrata, tua'ua' om paha'.



## I GODU OM I KILAU (bolikan 103)

Di pogulu po miambalut kaka i Kilau om i Godu. Orohian tomod yolo do moginakan om rumamai. Rumamai om moginakan kasaasari yolo.

Insan tadau, kopomusarahai di Kilau do okon i' ko' kasaasari do magadau. Nuru orikot o timpu gumompus. Nung rumamai om moginakan nopo kasaasari nga aawi no o taakanon. Aiso nodi akanon ontok timpu gumompus di abantalan. "Au oku kawasa do tumilombus miagal diiti. Nuru kumalaja oku do mongumpai taakanon ontok timpu gumompus," ka di Kilau.

Timpuun no kaka di Kilau do monguntun taakanon. I Godu nopo nga kaakal i' do rumamai om moginakan. Napaasan no i Kilau do momiraso di Godu nga amu ii' yau mokinongou.

Soira korikot timpu gumompus, amu nodi i Kilau sumoliwan mogihum taakanon. "Nasip po tu ogumu taakanon nountun ku," ka dau do ounsikou.

Insan tadau maamaso di Kilau do mundorong-dorong, korongou dau tuni tobobon kinoritik mantad soliwani. "Tok...tok...tok...tok...tok"

Liga no kaka i Kilau id tifigaon. Kokito dau i Godu nayagos om tomisan poingandad id soliwani lamin. Iwangai di Kilau tobobon om uhoto' no dau i Godu. "Nokuro ko?"

Louson tomod i Godu tu amu nakaakan do piipiro tadau. "Uhupai oku oi Ilau, kodut-kodutai oku do taakanon okuudi," ka di Godu. Onuai no di Kilau i Godu do taakanon.

Mantad no dii, suminimban nodi i Godu. Aparu di yau do kumalaja.



# GLOSARI

## UNIT 1 – SIKUL KOGINAWAAN KU

abaaal - mahir	nosind <u>u</u> alan - tercedera
alansan - berharap	olingasan - sembuh
angkaban - cita-cita	otorodok - fokus
bayahan - tahniah	pisingkanaai - lakonkan
dumontol - akan datang	siwaton - luangkan masa
kointalangan - keterangan	tinamb <u>a</u> hai bosikol - garaj basikal
kokorui - bekalan	titungkap - buah tangan
muyud - berbaris	tumomb <u>u</u> lui - melawat
nokosim <u>b</u> an - telah berubah	tumound <u>a</u> - bersedia

## UNIT 2 – SIPOOT

gaab - niat	nakaampayat - menyertai
kalansanan - harapan	nakalanut - sudah liat
mamagampot - mencapai	nayatan - peringkat
mamarabai - merentas	nosiliu - menjadi
minamabo - mendukung	ouhai - mudah
minggoos - buat sehabis baik	padau loyog - perahu layar
minongopot - menyambung	piumpangalan - perbualan
mobi pogun - mewakili negara	ponibung - penyelimut
mulong pia - walaupun	tumongob - risau/bimbang

## UNIT 3 – TIMPU OUNSIKOU

atapan - tampi	nakalantoi - memenangi
bombong - tepi bumbung	olunok - lemak
gambaranan - ditutup dan dilakri	oombung - subur
gatas - susu	oongid - harum
gowihon - goreng tanpa minyak	opooporot - kelat
kanasan - berlaukkan	osuhatan - secukupnya
kinibit - tembuni	panau - perjalanan
kogoogolok - baru mendidih	pinosurung - dihidangkan
kongingis - tersenyum	puyut - kolong rumah
koontiho - bersin	sinuko - acar/jeruk
kosingud - roh-roh jahat	tutukon - tumbuk
lompigon - penyek	worung - limau
mungkodom - menutup mata	

## UNIT 4 – POMOINAN

apaasan - bosan	pataranan - tempat menjual
huliton - ulang	pogitaatabi - bersalam-salaman
kawo - jenis	pomoinan rinukut-rukut - sukaneka
koligogon - merbahaya	sandad - tradisional
kouyat - mencergaskan	sinalapid - ditocang
likobon - lipat dihujung	sompomogunan - sedunia
lisok - sembunyi	sompoopori - masing-masing
momuruan - mengetuai	sungkad-tukad - jiran
orumbak - rosak	taris - perca
otolong - ligat	

## UNIT 5 – TUUNION

atangkangau - sibuk	oiyang - nyaring
minidu pogun - meninggalkan dunia	otoboi - sabar
minonigowo - mengejut	pangampot - mengiringi
nokotigog - terkejut	pokiikitanan - pameran
nokotimbaba - menghadapi	songkoogungan - satu set gong
oimbayat - terpengaruh	

## UNIT 6 – PADSAKAYAN

kagabasan - kemerdekaan	ouhai - mudah
koluung - terpandang ke bawah	pootodo' - hantar
kotogisan - pantai	popowaliu - memindahkan
miningkalaid - berlengah-lengah	sanggara-gara - bersorak-sorak
monoriulud - menyusun semula	sombol - jiran
nawaawayaan - pengalaman	susumangod - askar
orumpos - muat	tinduo' - teka

## UNIT 7 – TANOM POSORILI

binabang - cahaya	posurut - membesarkan
mogitaatabang - bergotong-royong	rumuyou - akan layu
momoomoli - membeli-belah	siongsoi - selada air
mongilag - mengelakkan	tapol - hampas padi
mungkalad - mekar	tongus - angin
oponsol - penting	topion - tempat hinggap
otitui - disinari	tunguhan - disiram
patayado' - senaraikan	winatang - batas
pomoluhub - penyubur	winikok-wokok - kolam kecil
pongugad - penghalau	winonsoi - dibuat
popoindalan - mengerjakan	sokoon - tempat hinggap

## UNIT 8 – PAKALAJAAN

dupot - binatang hutan  
koburuon - kemajuan  
kogirot - mengeratkan  
kolihis - menghiburkan  
konuluhan - bukit bukau  
mongusap - mengubati  
mamagakom - menangkap  
miau - hidup

ngingis - senyuman  
nuru - mesti  
opuhawang - pemurah  
osuau - peramah  
pomoruta - penghancur  
pongintorus - memburu  
toluwau - longgar  
wanadan - diberkati

## UNIT 9 – TAYAM

asapou - lebat  
bulang - taji  
kobolingkanan - masalah  
lintuhun - turun  
mangahu - mencakar / menggaru  
mintopik - melompat dari dahan ke dahan  
mongudut - membohong  
noimaan - perbuatan  
noinsamakan - dihampiri  
norulahan - diganggu ketika sedang tidur  
odomut - jalan perlahan-lahan

olunggui - sedih  
oporodot - comel  
opunso - pupus  
osikap - cepat  
pinggiak - berteriak  
pinopoimamang - mempermain  
ponguhup - membantu  
ponimbit - menyambar  
singabo' - menangkap dengan mulut  
suminako - hinggap  
sunduan - semangat

## UNIT 10 – SONGONGI'

botung-botung - lubuk sungai  
koligogon - merbahaya  
kosusuangan - pintu masuk  
kotimung - menakung  
kounggar - terjelok  
logot-logoton - membuat sesuatu dengan perlahan-lahan  
longkod pomudolian kawagu - pusat kitar semula  
momohingi-hingi - mengejek-ejek  
minangalap - menjemput  
mongolus - menanggalkan

naanggag - jatuh  
nohuyan - penat  
noiduanan - tertinggal  
norobuk - reput  
oponsol - penting  
pinuwalai - rumah penyengat  
piobpinayan - persaudaraan  
pugagon - menepis dengan tangan  
sangkataamai - buang merata-rata  
sonlonit-lonit - bengkak-bengkak  
tomisan - kesejukan  
tongosahap - daun-daun kering



Dengan ini, **SAYA BERJANJI** akan menjaga buku ini dengan baiknya dan bertanggungjawab atas kehilangannya, serta mengembalikannya kepada pihak sekolah pada tarikh yang ditetapkan.

<b>Skim Pinjaman Buku Teks</b>			
<b>Sekolah</b> _____			
Tahun	Darjah	Nama Penerima	Tarikh Terima
Nombor Perolehan: _____			
Tarikh Penerimaan: _____			
<b>BUKU INI TIDAK BOLEH DIJUAL</b>			



ISBN 978-983-49-2043-2



9 789834 920432

BT223003